

# Is Nehuna He Surat Ni Epustul Pablo Ziyà Te Menge TigKurintu

## Is Mehitenged te Nehuna he Surat he Para te Menge TigKurintu

Is inged he Kurintu nepenù te mezaat. Is menge etew kayi, ebeelan dan is minsan hengkey he paagi te kebaal te salà. Mahabet is menge vahi kayi he ebpemelegya te zengeg dan wey mahabet daan is kenà tutuu he megbevayà he ed-ezapan te menge etew kayi. Ne is menge etew kayi, indengeg he menge legezen.

Hein nekeuma si Pablo ziyà te Kurintu, mahabet he menge tigKurintu is mid-iniyugan dan is menge vaal zan he mezaat su nehimu en sikandan he sumusundan ni Jesus. Mid-ubpà si Pablo ziyà te Kurintu seled te sengetuig wey tengà ne zutun he timpu mibpenurù din is menge tumutuu.

Ne hein nepipire en he tuig is ked-ewai ni Pablo te menge tigKurintu, duen nezinged din mehitenged kandan he utew ingkesemuki te gehinawa zin. Netudtulan sikandin he mezakel kandan is mibmeluya is kedtuu wey kebminahalà. Duen дума he kenà egkilala te kegkeepustul ni Pablo wey zuen daan egkengesumpakì wey zuen utew mesamuk is ulaula zan; iring is menge ulaula zan te ulaula te menge etew zutun he wazà medtuu te tutuu he Megbevayà.

Umbe midsawey sikandan ni Pablo ke maan is ebpesumsumbungè dan is menge tumutuu ziyà te menhuhusey he kenà tumutuu. Wazè dan be metueni he nesevaha zan pinaagi te kedtuuwi zan ki Jesu Kristu? Ne maan is kenè dan egkilelaan is kegkeepustul ni Pablo? Wazè dan be metueni he Megbevayà is mibegey kandin te kegehem te kebpenurù kandan? Ne maan is ebaal zan te meremerik he menge vaal? Wazè dan be metueni he ed-ubpà is Wagas he Mulin-ulin diyà te lawa zan?

Piru minsan pa te iyan heini, mibmahal gihapun ni Pablo is menge tumutuu ziyà te Kurintu ne nekagi zin kandan is pelanu zin te kebpenumbaley ziyà te kandan su wey zin sikandan mezasig.

Is puunà te terebabahu ni Pablo ziyà te Kurintu egkevasa ta ziyà te Nengeulaula 18:1-11.

**1** <sup>1,2</sup>Siak si Pablo is midtezù te Megbevayà he epustul ni Jesu Kristu su iyan egkesuatan te Megbevayà. Siak wey si Sustinis is sevaha he suled tew pinaagi te kedtuu, ebpesuratan dey sikiyu is menge tumutuu te Megbevayà diyan te inged he Kurintu. Midhimu kew en he menge gaked te Megbevayà pinaagi te kegkesevaha niw ki Jesu Kristu. Mibpili kew te Megbevayà ne tenged kayi menge zuma kew en te langun he menge etew ziyà te minsan hendei he nemeketuu te Nengazen tew he si Jesu Kristu su iyan si Jesus edlingahaan tew te langun he ed-azap kandin.

<sup>3</sup>Ikegagew kew te Amey tew he Megbevayà wey te Nengazen tew he si Jesu Kristu ne vegayi kew zan te melinawen he kebpekesavuk.

### Is Tuvad Pinaagi ki Jesu Kristu

<sup>4</sup>Layun dekelà is kebpeselemati ku te Megbevayà tenged te gagew zin keniyu pinaagi te kebpekidsevaha niw ki Jesu Kristu. <sup>5</sup>Su pinaagi kandin utew zekelà is kedtuvazi keniyu te Megbevayà ne zekelè en is kedsavut niw, ne metau kew en he ebpenurù. <sup>6</sup>Ne utew en midmezesen is kedtuu niw te impesavut dey keniyu mehitenged ki Kristu. <sup>7</sup>Ne tenged kayi imbegey en daan keniyu te Wagas he Mulin-ulin is minsan hengkey he ketau he egkinehnglanan niw kayi te kedtagad niw te ked-uman kebulus te Nengazen tew he si Jesu Kristu. <sup>8</sup>Iyan sikandin edlig-en keniyu taman te ketepusan he timpu su wey wazà igkesewayi keniyu zutun te andew keuzemà te kedlikù din. <sup>9</sup>Is Megbevayà, egkeserigan tew is lalag din, ne iyan sikandin mibpetuu kenitew wey kiw mebpekid-upakat ki Jesu Kristu he iyan Anak din wey iyan Nengazen tew.

### Is Kebpekedsesemberawà te Menge Tumutuu

<sup>10</sup>Menge suled ku tenged te kedtuu, duen idhangyù ku keniyu pinaagi te kebayaàbayà kenitew te Nengazen tew he si Jesus; iyan is: kinahnglan he kenè kew mevahinbahin, kekenà, uyun-uyun kew su wey mesevaha is isip niw wey gehinawa niw. <sup>11</sup>Umba egkegiyen ku heini, menge suled, su zuen menge zuma ni Keluwi he midtudtul kedì he egkengetebektekew kew ziyàn. <sup>12</sup>Iyan ibpesavut ku is: selakew kun is edtindegan te uman sevaha te sikiyu su egkagi kun is sevaha he iyan a si Pablo is edsundanan din. Ne egkagi is sevaha he si Epulus mulà is edsundanan din. Ne egkagi is sevaha he iyan kandin he edsundanan si Pedro. Ne egkagi is sevaha he si Kristu mulà is kandin. <sup>13</sup>Uteu mezaat heeyan! Nevahinbahin bes si Kristu ziyàn te keniyu? Kunaan niw vuwa ke iyan a si Pablo kes inransang te krus wey kew melibri. Kunaan niw vuwa ke nebewtismuwan kew su wey kew mekesundan kedì.

<sup>14</sup>Uteu zekelà is kebpeselemati ku te Megbevayà su iyan ku zà nebewtismuwan diyan si Crispo wey si Gayu. <sup>15</sup>Ne tenged kayi wazà

minsan hentei keniyu he ebpekekagi he nebewtismuwan sikandin su wey sikandin mekesundan kedì. <sup>16</sup>Duen pe bes nebewtismuwan ku ziyàn he iyan ensi Istipenas. Ne gawas dutun wazè ku en egketenuzan ke zuen pa nebewtismuwan ku ziyàn te keniyu. <sup>17</sup>Su si Kristu, wazè e zin sugua wey a mekebewtismu, kekenà, iyan insugua zin kedì su wey ku ikesangyew is Meupiya he Tudtulanen. Ne impesavut din kedì he kinahanglan he kenè ku egemiten is kelibutanen he ketau te kekgagi su kela ke egkevenaran is menge etew tenged te ketau ku ne egketembunan is gehem ni Kristu te kedlibriya kandan pinaagi te kebpatay zin duen te krus.

### Is Gehem wey Ketau te Megbevayà

<sup>18</sup>Ne emun ibpesavut ta ziyà te menge etew is kebpatay ni Kristu zuen te krus, sikan is menge etew he kenà egkelibri te silut, kunaan dan ke wazà pulus te ibpesavut ta. Iyan, sikita is nelibri en te silut, netuenan ta he pinaagi te kebpatay te kebpatay ni Kristu, ibpaahà te Megbevayà is gehem din te kedlibriya te menusiya. <sup>19</sup>Ne mehitenged kayi zuen insurat he Lalag te Megbevayà he edhenduen te,

“Is ketau te menge uluwanen,  
edhimuwen ku he wazè din pulus,  
ne is kedsavut te nemeketunghà,  
ibpeehè ku he tarù,” ke sikandin.

<sup>20</sup>Ne egkesavut ta kayi he wazè en pulus te ketau te menge uluwanen, ne wazà daan pulus te kedsavut te nemeketunghà wey te menge metau he egkagi zini te kelibutan. Su impesavut en te Megbevayà he is ketau he zini zà ebpuun te kelibutan, wazè en pulus diyà te kandin.

<sup>21</sup>Uteu metau is Megbevayà; midhimu zin he kenà egketuenan te menge etew ke hentei sikandin pinaagi te kandan dà he ketau su midhimu zin he egkelibri sikandan pinaagi zà te kedtuu zan te Meupiya he Tudtulanen he ibpenurù ta he kunaan dan ke tarù he wazè din pulus. <sup>22</sup>Is menge etew he Hudiyu, kenè dan edtuu ke kenè dan egkeahà is menge egkengein-inuwan he tuus te gehem te Megbevayà. Is menge etew he Gerisyahanen, iyan edserigan dan is metau he ed-isip. <sup>23</sup>Ne sikitew mulà, ibpenurù tew is mehitenged ki Kristu he inransang te krus. Is menge Hudiyu, igkeepes dan utew heini ne is menge Gerisyahanen ne kunaan dan ke tarù ne wazè din pulus. <sup>24</sup>Iyan, is minsan hentei, Hudiyu se Gerisyahanen, emun ebpeming dan te Megbevayà dutun te kebpetuuwa zin kandan, netuenan dan he pinaagi te kedrensanga ki Kristu impezayag te Megbevayà is gehem din wey ketau zin. <sup>25</sup>Su heini is kedrensanga ki Kristu he ibpesavut tew he kunaan te menge etew ke utew tinulebung, ne pinaagi kayi ibpaahà te Megbevayà is ketau zin he lavew utew kenà te ketau te menge etew. Kunaan dan ke wazà gehem te Megbevayà, iyan, lavew is gehem din te gehem he ziyà ebpuun te isip te etew.

<sup>26</sup>Kenè niw, minge suled, lipati ke hengkey kew zengan hein wazè kew pa ipetuu te Megbevayà. Su ziyàn te keniyu te minge tumutuu, mezelang is etew he egkekagi te minge etew he utew metau; mezelang is lavew is pid-etawan din; mezelang daan is sepian. <sup>27</sup>Ne minsan pa zutun mibpili kew te Megbevayà wey kew melibri. Su is minge etew he kunaan te kezekelan ke kenà memetau, iyan mibpili te Megbevayà su wey mingeled is uvag memetau. Ne haazà is minge etew he kunaan te kezekelan ke wazà utew egkehimu, mibpili din daan su wey mingeled is minge zuen dan uvag gehem. <sup>28</sup>Elin daan mibpili te Megbevayà is minge etew he edsudien te minge etew zini te kelibutan. Iyan mibpili din is egkegiyen te minge etew he kenà memetau wey wazà minge pulus. Umba mibpili din is minge iring kayi su wey zin ikepesavut he wazà pulus diyà te kandin is minsan hengkey he kunaan te minge etew ke zekelà is pulus. <sup>29</sup>Ne tenged kayi wazà minsan hentei he ebpekeantal te ketau zin wey gehem din diyà te etuvangan te Megbevayà. <sup>30</sup>Ne minsan pa zutun, midhimu te Megbevayà he mesevaha si Jesu Kristu wey sikiteu ne midhimu zin daan he zuen ketau tew he ebpuun te ki Kristu. Ne pinaagi ki Kristu mid-isip kiw en he metazeng te Megbevayà ne nehimu kiw en daan he minge gaked te Megbevayà, ne nevelukan kiw zin te kegkeuripen tew te mezaat he ulaula. <sup>31</sup>Ne tenged kayi utew venar is insurat dengan he Lalag te Megbevayà he edhenduen te, “Ke zuen etew he egkesuat he edantal, ne kinahanglan he iyan dà izantal zin is nengehimu te Nengazen.”

### Is Ketudluan Pinaagi te Wagas he Mulin-ulin

**2** <sup>1</sup>Siak, minge suled, dutun te aney ku kebpekeuma ziyàn, hein impesavut ku ziyàn te keniyu is mehitenged te Megbevayà, ne wazè ku gemita is ketau te kegkagi wey is minge ketezengan he mibeelan te etew zà duen. <sup>2</sup>Su neisip ku he iyan ku zà ibpesavut diyàn is penurù mehitenged ki Jesu Kristu wey is kedrensanga kandin te krus. <sup>3</sup>Ne hein nekeuma a ziyàn te keniyu utew a migkulbai su utew a egkehandek su kela ke kenè ku egkehimu is ebpeveelan kedè te Megbevayà. <sup>4</sup>Ne hein midlelagan ku sikiyu wey impesavut ku keniyu is Lalag te Megbevayà, wazè ku iyan gemita is ketau te kegkagi wey is minge mekempet he lalag. Su is Wagas he Mulin-ulin, iyan mibpirma te egkegiyen ku pinaagi te gehem din <sup>5</sup>su wey mehimu he kenà iyan niw meserigi is ketau te etew zà duen, kekenà, iyan niw meserigi is gehem te Megbevayà.

### Is Impezayag te Wagas he Mulin-ulin

<sup>6</sup>Ne haazà is minge etew he mezesen is kedtuu zan te Megbevayà, duen ketau he ibpesavut ku kandan, asal, is ketau he ibpenurù ku kandan ne kenà daan ebpuun te etew zà duen wey ziyà te minge pengulu he iyan ebayàbayà

dini te kelibutan su egkeewaan en heini te minge gehem dan. <sup>7</sup>Heini is ketau he egkegiyen ku, ne iyan kes in-eles he edhimuwen te Megbevayà he wazà metueni zengan te menusiya. Dengan dà te wazè pa limbaga is minsan hengkey, daan he mid-isip te Megbevayà heini is edhimuwen din su wey kiw tulusa. <sup>8</sup>Ne haazà is minge kelibutanen he pengulu, wazè dan mesuati te edsavut ke hengkey is edhimuwen te Megbevayà su ke nesavut dan, wazè dan pezem iransang te krus kes mekegegehem he Nengazen te langun. <sup>9</sup>Ne tenged kayi iyan ibpenurù dey is insurat dengan he Lalag te Megbevayà he edhenduen te,

“Is utew meupiya wey egkein-inuwan he wazè pa maahà wey wazè pa mezineg te menusiya wey wazè pa meisip te minsan hentei he etew, ne iyan heini mid-andam te Megbevayà he ibegey zin diyà te langun he minge etew he mahal sikandin diyà te gehinawa zan.”

<sup>10</sup>Ne heini is in-eles din dengan, impesavut din en kenitew pinaagi te Wagas he Mulin-ulin. Su is Wagas he Mulin-ulin, egketuanan din is minsan hengkey, minsan is utew mezalem he in-eles he minge isip te Megbevayà. <sup>11</sup>Hentei is nesayud te isip te sengeetew ke kenà iyan dà haazà is etew nesayud ke hengkey is diyà te keugelingen he isip din. Ne iring din ded daan iyan dà is Wagas he Mulin-ulin nesayud ke hengkey is isip te Megbevayà. <sup>12</sup>Sikitew is minge tumutuu, imbegey kenitew te Megbevayà is Wagas he Mulin-ulin ne is ed-ulin kenitew, diyà ebpuun te Megbevayà ne kenà ebpuun diyà te etew zà duen. Umba imbegey is Wagas he Mulin-ulin kenitew su wey tew mesavut is langun he ibegey kenitew te Megbevayà.

<sup>13</sup>Ne tenged kayi iyan ibpenurù dey is impesavut kenami te Wagas he Mulin-ulin, ne kenà iyan is impesavut kenami te memetau he etew zà duen. Is ebpuun diyà te Wagas he Mulin-ulin, ne iyan ibpesavut dey ziyà te minge etew he mid-ulinan daan te Wagas he Mulin-ulin. <sup>14</sup>Ne is etew he wazà diyà te kandin is Wagas he Mulin-ulin, kenè din edewaten is ibpenurù te Wagas he Mulin-ulin su wazà pulus kayi ziyà te kandin, ne kenè din daan egkesavut su iyan dà ebpekeseysey kayi ziyà te kandin is Wagas he Mulin-ulin. <sup>15</sup>Ne sikan is etew he ziyà te kandin is Wagas he Mulin-ulin, egkesavut din mulà is pulus te minsan hengkey he ibpenurù te Wagas he Mulin-ulin. Iyan, haazà is etew he wazà diyà te kandin is Wagas he Mulin-ulin, kenà sikandin ebpekesavut ke hengkey is diyà te isip te minge etew he mibegayan te Wagas he Mulin-ulin. <sup>16</sup>Su zuen insurat he Lalag te Megbevayà he edhenduen te,

“Wazà etew he nesayud ke hengkey is diyà te isip te Megbevayà, ne wazà daan ebpekenurù te Megbevayà.”

Iyan heini insurat dengan, iyan, sikitew mulà, impetuanan kenitew ke hengkey is diyà te isip ni Kristu.

### Is Minge Suluguen te Megbevayà

**3** <sup>1</sup>Menge suled, hein diyan e pa te keniyu, wazè ku ikepenurù keniyu is mezalem he penurù iring te kebpenurua ku te minge etew he

mid-ulinan te Wagas he Mulin-ulin su henduen kew te minge watè pa te kedtuu ki Kristu wey minge etew he ebeyveyaan te suat dan. <sup>2</sup>Umba, gatas dà ne kenà mehunit he egkeenen is keuyagan he imbegey ku keniyu, *he ke và dà egkegiya, kenà minge mezalem is impenurù ku keniyu su wazè niw pa zutun mesavut is mezalem he penurù. Ne minsan guntaan, kenè niw pa egkesavut is iring kenian* <sup>3</sup>su kemulu kew pa ebeyveyaan te keniyu zà he suat. Su zuen kun duma keniyu he egkesina ne zuen duma pa he ebpekidebek, ne tenged kayi henduen be te ebeyveyaan kew pa te suat niw iring te minge etew he wazè pa medtuu ki Jesus. <sup>4</sup>Ke zuen duma niw he egkagi he sumusundan ku sikandin ne ke zuen pa sevaha he egkagi he sumusundan mulà sikandin ni Epulus, utew keladu he kemulu kew pa iring te minge etew he wazà medtuu.

<sup>5</sup>Isipa niw man heini. Siak si Pablo, hentei a? Ne hentei zaan si Epulus? Suluguen key zà te Megbevayà. Pinaagi kenami midhimu zin he meketuu kew. Edtumanen dey zà is ebpevelan din kenami. Ne iyan dà ed-ullahan dey. <sup>6</sup>Siak, iring a te ebpemula. Ne si Epulus, iring te ebinyag te pinemula, iyan, ke wazà ipetuvù te Megbevayà haazà is impemula wazè din pulus. <sup>7</sup>Ne tenged kayi, haazà is ebpemula wey haazà is ebinyag, kenà iyan sikandan edeligen, kekenà, iyan edeligen is Megbevayà su ibpetuvù din haazà is impemula. <sup>8</sup>Ebpeked-iring is pulus te ebpemula wey is pulus te ebinyag ne edsuhulan heini is dezuwa te Megbevayà sumalà is mibeelan dan. <sup>9</sup>Siak wey si Epulu, ebpetevangè key su telezuma key he suluguen te Megbevayà. Ne sikiyu, iring kew te kamet te Megbevayà he iyan edterebehuwen dey.

Iring kew zaan te ebelayan te Megbevayà. <sup>10</sup>Ne siak, henduen a te pandey te Megbevayà su imbegey zin kediey is gehem su wey mehimu he iyan a edsavuk diyan te keniyu te vatu he edtukuzan te valey ne selakew en is ebvaley zuen, *he ke và dà egkegiya, selakew en is ebpenurù keniyu guntaan. Ne kinahanglan he is kada sevaha he ebvaley ne purungi zin is baal zin.* <sup>11</sup>Su sebsevaha zà is egkehimu he edtukuzan diyan, ne iyan dà si Jesu Kristu su wazè en duma. <sup>12</sup>Ne ke zuen ebvaley zutun te ki Jesu Kristu, mezakel is egkegamit din he himan te valey. *Ne heini is minge himan, ne iyan kehulugan din is minge penurù. Ne penenglitan ke utew ebpeketavang is penurù te sevaha he etew ne iring heini te himan he vulawan, selapì, wey minge mahal he vatu su kenà heini egketutung te hapuy. Ne emun kenà utew ebpeketavang is penurù ne iring heini te kayu zà duen wey karan wey ventung su melemu heini mulà egkevinsulan.* <sup>13</sup>Ne keuzemà dutun te andew te kedsusi te Nengazen te menusiya, egezaman is baal te kada sevaha he tumutuu su wey metueni ke hustu ve wey ke kenà. Egezaman pinaagi te hapuy ne haazà is baal he iring te kayu wey karan wey ventung ne egkeawà. Ne haazà is baal he iring te vulawan, wey selapì, wey minge mahal he vatu, ne kenà mulà egkeawà. <sup>14</sup>Ne ke

zuen etew he wazà maawà is kandin he vaal ne edsuhulan sikandin te Megbevayà. <sup>15</sup>Ne ke zuen etew he naawè en dutun is kandin he vaal, egkelibri sikandin gihapun te silut asal wazà suhul kandin. Iring sikandin te etew he nekegawas te valey he nevinsulan he wazà uwiten din.

<sup>16</sup>Sikiyu is minge tumutuu te Megbevayà, utew a egkeinuinu keniyu su henduen be te wazè niw mesavut he iyan kew kes baley he ed-ubpaan te Megbevayà su ziyàn te keniyu ed-ubpà is Wagas he Mulin-ulin he Megbevayà. <sup>17</sup>Ne ke zuen etew he edèdeetan din is ed-ubpaan te Megbevayà, edsilutan sikandin te Megbevayà su mahal ziyà te Megbevayà is minge etew he iyan ed-ubpaan din. Ne iyan kew ed-ubpaan din.

<sup>18</sup>Kinahanglan he kenè kew mebpetazin te minge ulaula niw su ke zuen sevaha keniyu he ed-isipen din he zuen ketau zin te ked-isip sumalà is ked-isipa kandin te zuma zin he menusiya, deyzey ke ed-engkezan din is kandin he ketau wey sikandin mehimu he etew he kenà metau sumalà is ked-isipa kandin te minge etew. Ne human egkehimu sikandin he metau iyan he venar. <sup>19</sup>Su is ketau kayi te kelibutan, ne wazè din pulus diyà te Megbevayà su utew lavew is kandin he ketau. Su zuen insurat he Lalag te Megbevayà he edhenduen te, “Is ketau te metau he etew he igkelupigi zin te zuma, egkehimu he iyan ibpekesipè din te selaid te Megbevayà.” <sup>20</sup>Wey heini pa zaan is insurat he edhenduen te, “Netueanan te Megbevayà he wazà pulus te ed-isipen te memetau he etew.” <sup>21</sup>Umba, kinahanglan he wazà medantal te minsan sevaha keniyu he egkagi te sakup sikandin te sengeetew. Su sikami is langun he ebpenurù, imbegey key te Megbevayà keniyu su wey kew mezeyzey. <sup>22</sup>Sikami si Pablo wey si Epulus wey si Pedro zaan, iyan key nehimu te Megbevayà he minge suluguen niw su wey kew mezeyzey. Ne minsan is tivuuk he kelibutan wey is egkeulaula keuzemà, wey is egkeulaula guntaan wey minsan is untung niw wey kebpatay niw, imbegey zaan heini is langun te Megbevayà wey kew mezeyzey. <sup>23</sup>Ne sikiyu, minge sakup kew zà ni Kristu, ne si Kristu, sakup sikandin daan te Megbevayà.

### Is Minge Epustul ni Jesu Kristu

**4** <sup>1</sup>Ne sikami is ebpenurù, kinahanglan he isipa key keniyu he minge suluguen dà ni Kristu. Insarig te Megbevayà kenami is kedseysaya te langun he minge in-eles din dengan he tuluuwen. <sup>2</sup>Ne is sinerigan, ne kinahanglan he metinumanen sikandin te minge sugù te egalen din. <sup>3</sup>Iyan, kenè ku igkesamuk ke hengkey is egkegiyen niw wey ke hengkey is egkegiyen te etew zà duen mehitenged te kedtumana ku te ebpevelan kedì te Megbevayà su kenè kew iyan edsusi kedì. Kenè daan egkehimu he iyan a edsusi te vaal ku. <sup>4</sup>Minsan te wazà egketueanan ku he sayep ku, egkehimu pa he zuen pa kurang te ebeelan ku su iyan metau is Megbevayà. Iyan sikandin edsusi te minge vaal ku. <sup>5</sup>Umba, kenè

kiw edsawey te minge zuma tew, kekenà, edtegzan tew is kedlikù te Nengazen tew he si Jesus. Ipegawagawa zin dutun is nekeeles he minge vaal te minge etew guntaan, ne ibpetuenan din is wazè pa metueni he minge ed-isipen te minge etew. Ne zutun egketuenan te kada sevaha he etew ke zuen igkezeligi kandin te Megbevayà wey ke wazà.

<sup>6</sup>Minge suled, kayi te langun he migkagi ku, migamit ku he penenglitan si Epulus wey is kediey he keugelingen su wey mekepenurù heini keniyu ke hengkey is hustu he ed-ul-olahan sumalà is ipesavut te insurat he Lalag te Megbevayà. Iyan is: kinahanglan he engkezi niw is kebpelevawa te penurù te sevaha kenami su sikami is ebpenurù, wazà lavew kenami su nekedrepeng key. <sup>7</sup>Kunaan niw vuwa ke lavew kew te minge zuma he tumutuu ki Kristu. Is dekelà he kedsavut niw, ne kunaan niw vuwa ke zaan heini ziyen te keniyu ne wazà ivegey keniyu te Megbevayà! Su emun netuenan niw he imbegey zà heini keniyu, maan is idantal niw?

<sup>8</sup>Kunaan niw vuwa ke wazè en egkinehnglanan niw he tavang te Megbevayà. Henduen be te midtulus kew en ne is langun he minge tuvad te Megbevayà, ne nekuwa niw en. Kunaan niw vuwa ke edhadì kew en dutun te ginhedian te Megbevayà ne sikami is minge epustul, kenè key pa ebpekehadì. Meupiya iyan pezem ke tutuu he edhadì kew en su wey key zaan mekehadì duma keniyu. <sup>9</sup>Umba egkekagi ku heini su sikami is minge epustul, midhimu te Megbevayà he iyan key minge etew he utew minus is pid-etawan din. Iring key te minge pirusu he edhimetayan he ebentayan te langun he minge linimbag, wey te tivuuk he menusiyà, wey te langun he minge velinsuguen te Megbevayà he ebpemuum te langit. <sup>10</sup>Sikami, egkegiyen te minge etew he kenè key metau he ed-isip su ibpenurù dey is lalag ni Kristu. Ne sikiyu mulà, egkegiyen niw he utew kew metau tenged te kedtuu niw ki Kristu! Telawen key kun, iyan, sikiyu, utew kew memevurut! Edtehuzen kew te minge etew, iyan, sikami, kenè key mulà edtehuzen, kekenà, ebpesipelahan key zan. <sup>11</sup>Sikami, minsan guntaan, egkealang-alang key te egkeenen dey wey ed-inumen dey; ebpemugelen key ne minsan is hustu he ugelingen dey, ne wazà. Ne minsan is ed-ubpaan dey ne wazà daan. <sup>12</sup>Kinahanglan he edhagù key su wey zey mekuwa is minge kinahanglan dey. Ne ke edrewakan key te minge etew kenè key edtavak, kekenà, id-ampù dey sikandan he tuvazi sikandan te Megbevayà. Ne emun ebpesipelahan key ne ed-entusen dey. <sup>13</sup>Ne emun ed-el-elezen key ne kenà mezaat is idtavak dey. Minsan guntaan henduen key te rapek dà duen su kenè key idrerepengan te minge etew, ne henduen key te utew minus is pid-etawan din.

<sup>14</sup>Minge suled, kenà iyan igkegiya ku kayi su wey kew meeled, kekenà, su wey ku sikiyu mepenurù su nehimu kew en he minge minahal he anak ku pinaagi te kedtuu niw ki Kristu. <sup>15</sup>Su minsan pa te utew mezakel



is minge etew he ed-agak keniyu te minge tumutuu ki Kristu, sebsevaha ku zà is iring te amey niw tenged te kedtuu niw. Su hein impesavut ku keniyu is Meupiya he Tudtulanen, nehimu a he amey niw zutun te kedtuu niw ki Jesu Kristu. <sup>16</sup>Ne geina te amey a keniyu, edhengyuan ku sikiyu he med-iring kew kediey. <sup>17</sup>Umba, edsuguen ku ziyàn te keniyu si Timoteo. Minahal ku sikandin he anak he utew metinumanen te minge sugù te Nengazen. Ibpénurù din keniyu is minge ulaula ku, ne iyan heini meupiya he ed-ul-ulahan te tumutuu ki Kristu, ne iyan daan ibpénurù ku te minge tumutuu ziyà te minsan hendei he inged.

<sup>18</sup>Utew ebpegalbu is дума keniyu su kunaan dan ke egkehandek a he edhendiyàn te kedsusi keniyu. <sup>19</sup>Iyan, ke edtugut is Nengazen tew, megaan e en edhendiyàn ne zutun ed-ahaan ku ke hendei taman is kebpegalbu zan su kela ke taman dâ te minge lalag is kebpegalbu zan. <sup>20</sup>Haazà is kedhedii kenitew te Megbevayà, ne kenà pinaagi te minge lalag dâ, kekenà, pinaagi te zekelà he gehem din. <sup>21</sup>Ne hendei zapit is egkesuatan niw? Emun kenè niw ed-iniyugan is mezaat he ulaula, ebayaan ku sikiyu wey ku sikiyu mesiluti. Ne emun meupiya is ed-ul-ulahan niw, meupiya gihapun is kebpenumbaley ku ziyàn, ne zekelà is gagew ku wey hizu ku keniyu.

### Is Kedhukum Duen te Ebaal te Mahawag

**5** <sup>1</sup>Duen nezineg ku, minge suled, he zuen sevaha keniyu he utew meremerik is ulaula zin. Duen kun maama ziyàn he migkumpadi zin is esawa te amey zin. Ne minsan is minge etew he wazà medtuu te Megbevayà, wazà ulaula zan he utew mezaat he iring keniyàn! <sup>2</sup>Ne minsan pa zutun kemulu kew pa ebpegalbu. Kunaan niw vuwa ke utew meupiya is ulaula niw! Deyzey pezem ke egkeseeng kew. Kinahanglan pezem he wazè niw tuguti heeyan is maama he mebpekiduma keniyu. <sup>3</sup>Siak, minsan pa te zini a te meziyù, henduen be te ziyàn e en te keniyu su layun ku sikiyu ed-isipa. Ne iring te ziyàn e en, netuenan ku he zaan ke hengkey is hustu he idsilut keniyàn te etew he utew mezaat is mid-ulaula zin. <sup>4</sup>Kinahanglan he edtigum kew ne emun netigum kew en ne iring ded te zuma a keniyu su ziyàn te keniyu is isip ku ne idsugù ku keniyu he pinaagi te kegehem he imbegey te Nengazen tew he si Jesus <sup>5</sup>engkezi niw sikandin, ne ivegey niw sikandin diyà te ki Setanas su wey mezeeti is lawa zin ne human egkelibri is gimukid din te silut te Megbevayà keuzemà te andew te kedsusi te Nengazen tew he si Jesus.

<sup>6</sup>Maan is ebpegalbu kew? Netuenan niw is erubasa he edhenduen te, “Minsan ke zuen deisek dâ he tapey ne egketepayan din is sengebisin en he erina he ebeelan he supas.” <sup>7</sup>*Is mezaat he ulaula, ne iring te tapey su ke ed-ulaula is sevaha te mezaat egkeuwit din daan is mezakel he minge zuma zin. Kinahanglan he iawè niw ziyàn te keniyu is daan he tapey su wey wazà*

*mezaat diyan te keniyu. Emun edtumanen niw heini ne egkeiringan niw is begu en he supas he wazè din tapey. Netuenan ku he zaan kew en he iring kayi tenged te kedtuu niw ki Kristu. Su si Kristu, iring sikandin te nati he kerehidu he ibpemuhat emun Pista te Kedlevayi su impemuhat en sikandin wey kiw melibri.* <sup>8</sup>Ne tenged kayi, duen en daan kenitew he kedsilibra te Pista te Kedlevayi ne kinahanglan he kenè tew en maan egemiten is daan he supas he zuen din tapey he iyan is mezaat wey meremerik he ulaula, kekenà, iyan tew en egemiten is supas he wazè din tapey, he ke và dà egkegiya, is kedtumana te tutuu he tuluuwen wey is kedtutula te tutuu.

<sup>9</sup>Duen te nehuna he surat he impeuwit ku keniyu, insugù ku keniyu he kinahanglan he kenè kew mebpekiduma pa maan te minge etew he meremerik is ulaula. <sup>10,11</sup>Ne kenè ku iyan egkegiyen is minge etew he wazà medtuu te Megbevayà he meremerik is ulaula zan, wey minge legezen, wey minge tulisan, wey minge ed-azap te kenà tutuu he megbevayà, su emun iyan en haazà migkagi ku ne utew meregen he edlikayan su wey kiw zà ebpekelikey te iring dutun ke ed-awè kiw kayi te kelibutan. Iyan egkegiyen ku he edlikayan is etew he egkagi he tumutuu sikandin, iyan, mezaat is ulaula zin iring te meremerik is baal zin, wey ke legezen sikandin, ed-azap te kenà tutuu he megbevayà, ed-ulugan din te salà is duma he etew, lelunguten be, wey tulisan sikandin. Ne minsan is kegkaan dà duma kandin ne kenè kew medtampu.

<sup>12,13</sup>Iyan, haazà is minge etew he wazà medtuu ki Jesus, wazè tew kelavet duen te kedsusi te minge ulaula zan. Iyan edsusi kandan is Megbevayà. Iyan, kinahanglan he edsusiyen tew is minge ulaula te minge zuma tew he tumutuu su zuen insurat he Lalag te Megbevayà he edhenduen te, “Haazà is duma niw he mezaat is ulaula zin, kenè niw tuguti he mebpekiduma pa maan sikandin keniyu.”

### Is Kadhusey te Minge Tumutuu

**6** <sup>1</sup>Ne emun duen idsumbung te sevaha keniyu he zuma zin he tumutuu, maan is layun kew ebpehusey te minge zatù he kenà tumutuu? Kinahanglan he iyan edhusey kenitew is duma tew he tumutuu. <sup>2</sup>Wazè niw ve metueni he sikitew is minge tumutuu, iyan kiw ebpenhusey keuzemà te langun he minge etew zini te kelibutan? Ne emun egkehimu he ebpenhusey kiw te tivuuk he menusiya, wey pe be kenà egkehimu he edhusayen tew heini is minge zeisey he sumbung? <sup>3</sup>Su iyan kiw keuzemà edsusi te minge ulaula te minsan minge velinsuguen te Megbevayà ne iyan pe be kenè tew egkesusi is minge ulaula he zini zà te tanà! <sup>4</sup>Ne emun duen idsumbung te sevaha keniyu he zuma zin he tumutuu, kenà meupiya ke ibpehusey zin te etew he wazè din kelavet dini te kenitew te minge tumutuu? <sup>5</sup>Umba egkegiyen ku heini su wey kew meeed. Siguradu zuen sevaha keniyu he egkehimu he zatù he metau

he edhusey te minge tumutuu. <sup>6</sup>Iyan, sikiyu, ke zuen idsumbung niw he zuma niw ne kenà meupiya is ulaula niw su ziyè kew ebpehusey te huwis he kenà tumutuu. Ne kenà meupiya ke iyan edhusey kenitew is etew he kenà tumutuu.

<sup>7</sup>Ne heini is kebpesumsumbungè niw, wazè niw ve metueni he tuus heini he utew zekelà is kurang te kedsunud niw te Nengazen? Deyzey ke kenè kew medsukul ke zuen ebpesipala keniyu. Deyzey ke ed-egawan kew te minge azen niw, kenà te idsumbung niw is duma niw he tumutuu. <sup>8</sup>Iyan, sikiyu, ebpesipelahan niw wey ed-egawan niw is minge zuma niw he tumutuu! <sup>9</sup>Siguradu netueanan niw he haazà is minge etew he ed-ulaula te mezaat, kenà sikandan keuzemà egkehedian te Megbevayà! Ne tenged kayi, purungi niw heini isipa su wey kenè kew mesayep su is minge etew he meremerik is ulaula zan, is ed-azap te kenà tutuu he megbevayà, is etew he egkevut te kenè din esawa, is maama he egkeerigan te maama wey is bahi he egkeerigan te vahi, <sup>10</sup>is tekawen, is legezen, is lelenguten, is ebpen-ulug te salà diyà te zuma zin, wey is limbungan, wey is minsan hentei etawa he ed-ulaula te iring kayi, ne kenà sikandin egkehedian keuzemà te Megbevayà, kekenà, edsilutan sikandin. <sup>11</sup>Iring kayi is ulaula zengan te zuma keniyu, iyan, guntaan, nelumpiyuwan kew en te minge ulaula niw he mezaat ne nehimu kew en he minge gaked te Megbevaya. Ne pinaagi te gehem te ngazan te Nengazen tew he si Jesu Kristu wey pinaagi te ked-ulini keniyu te Wagas he Mulin-ulin he ebpuun te Megbevayè tew, mid-isip kew en he metazang te Megbevayà.

### Is Lawa Iyan ed-ubpaan te Megbevayà

<sup>12</sup>Ne ke zuen egkagi he sikitew is tumutuu, egkehimu en he ed-ul-olahan tew is minsan hengkey emun kenà mezaat su nelibri kiw en te kedtumana te kesuguan, ne utew venar heeyan, iyan, mezakel is ulaula he kenà ebpeketavang kenitew te kedtuu tew. Su minsan ke egkehimu he ed-ul-olahan ku is minsan hengkey, kenè ku idtugut he ed-uripenen a te minsan hengkey he ulaula. <sup>13</sup>Ne ke zuen daan egkagi he umba mibeelan te Megbevayà is getek ta su wey mahantey te egkeenen, ne utew zaan benar heeyan, iyan, duen timpu keuzemà he wazè en pulus te getek ta ne wazà daan dutun pulus te egkeenen su id-awà keuzemà te Megbevayà is kegemita kayi. Ne iring din ded daan is lawa ta, su kenà egkehimu he egemiten ta is lawa ta wey mahantey is suat ta zuen te etew he kenè ta esawa. Su wazà limbaga te Nengazen is lawa tew su wey tew meulaula is meremerik, kekenà, iyan inlimbaga zin su wey pinaagi kayi mezalig sikandin. Ne iring din ded daan pinaagi te Nengazen tew he si Jesus edtulusen keuzemà is lawa tew. <sup>14</sup>Su si Jesus, is Nengazen tew, ne mibanhew sikandin te Megbevayà ne ebenhawen kiw zaan keuzemà te Megbevayà pinaagi te zekelà he gehem din.

<sup>15</sup>Netuenan niw ve he heini is minge lawa tew te minge tumutuu, ne parti te lawa ni Kristu. Ne tenced kayi kenà egkehimu he egemiten ta is parti te lawa ni Kristu te kedhuliza te vahi he meremerik is ulaula zin. <sup>16</sup>Siguradu netuenan niw he is maama he edhulid te vahi he meremerik is ulaula zin, egkehimu is lawa zan te zezuwa he sevaha zà he lawa. Su zuen insurat he Lalag te Megbevayà mehitenced te maama wey vahi he ebpeked-esawa he edhunden te, “Haazà is dezuwa, ne egkehimu en he sevaha zà he lawa.” <sup>17</sup>Iyan, is etew he ebpekidsevaha te Nengazen tew he si Jesus, egkesevaha is gehinawa zin wey is gehinawa ni Jesus.

<sup>18</sup>Likayì niw is kegkevuta te kenè niw esawa su utew heeyan mezaat he salà. Is duma he minge salà ne mezaat daan, iyan, kenà pinaagi te lawa. Haazà is meremerik he ulaula, ne utew ebpekezezaat kenitew su pinaagi te lawa ta. <sup>19</sup>Siguradu netuenan niw he is lawa niw, ne iyan ed-ubpaan te Wagas he Mulin-ulin he imbegey keniyu te Megbevayà. Kenè ki en maan tegigaked te lawa ta, kekenà, <sup>20</sup>iyang tegigaked kenita is Megbevayà su utew mahal is imbelukas din kenita. Uмба, gemita niw is lawa niw te paagi he mevantug is Megbevayà.

### Is Kebpengesawa

**7** <sup>1</sup>Ne idsurat ku is tavak ku zuen te minge insè niw zuen te surat niw. In-insè niw ke meupiya ve ke kenè ki ebpengesawa. Ne meupiya iyang ke kenè ki is maama ebpengesawa, <sup>2</sup>iyang, geina te utew mezakel is minge etew he egkevut te kenè dan esawa, deyzey ke ebpengesawa is maama ne ebpeesawa is bahi su kela ke meuwit kew zuen te minge etew he meremerik is ulaula zan. <sup>3</sup>Ne sikiyu is teleesawa, kinahanglan he ebpehulizè kew. Kenà meupiya ke kenà edhulid is maama wey ke kenà edhulid is bahi. <sup>4</sup>Su is bahi, kenà iyang sikandin tegigaked te lawa zin, kekenà, iyang is esawa zin. Ne iring din ded daan, is maama, ne kenà iyang sikandin tegigaked te lawa zin su iyang is esawa zin. <sup>5</sup>Kenè niw iengked is lawa niw ziyà te esawa niw. Iyang, para kenà mesamuk is ked-ampù niw egkehimu he iengked niw emun neuyunan niw, asal taman dà te egkepipira he andew. Ne emun egketapus haazà is neuyunan niw, ne kinahanglan he ebpehulizè kew en maan su kela ke kenè niw meegen is suat niw ne egkepenulayan kew ni Setanas.

<sup>6</sup>Kenè ku sikiyu edsuguen he mebpees-eseweey kew, kekenà, sambag ku zà keniyu. <sup>7</sup>Su egkesuatan ku pezem he ed-iringan a keniyu is wazè din esawa, iyang, netuenan ku he wazà himuwa te Megbevayà he meked-iiring kiw su imbegey zin diyà te sevaha is kebpekeantus te kenà kebpengesawa, ne selakew is imbegey zin diyà te sevaha.

<sup>8</sup>Ne sikiyu is minge raga, minge kenakan, wey minge valu, iyang sambag ku keniyu is deyzey ke ed-iringan a keniyu is wazè din esawa, <sup>9</sup>iyang, ke kenè niw egkeegen is suat niw ne deyzey ke ebpees-eseweey

kew su zeyzey is duen din esawa kenà is egkeregenan tenged te suat te lawa zin.

<sup>10,11</sup>Ne sikiyu is telteleesawa, duen ku zaan sugù keniyu. Kenà kediey zà heini, kekenà, sugù te Nengazen tew. Iyan is: is bahi, ne kinahanglan he kenà mebpekidsuwey te esawa zin. Ne is maama, ne kinahanglan daan he kenè din engkezi is esawa zin. Iyan, ke zuen bahi he mibpekidsuwey en te esawa zin, kenà egkehimu he ed-uman ebpeesawa. Egkehimu ke ebpeuliey sikandan.

<sup>12</sup>Ne sikiyu is duma, duen sugù ku keniyu. (Kediey heini he sugù su wazà isugù heini zengan te Nengazen tew he si Jesus.) Iyan is: ke zuen maama he tumutuu he zuen esawa zin he wazà medtuu, ne kenà egkesuat haazà is bahi he ebpesuwayè dan, ne kenà egkehimu he ed-engkezan dutun te maama haazà is esawa zin. <sup>13</sup>Ne iring din ded daan is bahi he neketuu, kenà sikandin mebpekidsuwey te esawa zin he kenà tumutuu ke kenà egkesuat he ebpekidsuwey is maama. <sup>14</sup>Su sikiyu is nemeketuu te Nengazen tew he si Jesus he zuen esawa niw he kenà tumutuu, edtuvazan daan te Megbevayà is esawa niw tenged keniyu minsan ke wazà sikandin medtuu, ne edtuvazan din daan is menge anak niw. Su emun kenà heini tutuu, ebpekeiring is menge anak niw te menge anak te menge etew he wazà medtuu te Nengazen. <sup>15</sup>Ne ke zuen sevaha keniyu he zuen esawa zin he kenà tumutuu ne egkesuat he ebpekidsuwey haazà is kenà tumutuu ne tuguti niw. Su idtugut te Megbevayà he suwayi is tumutuu zuen te esawa zin he kenà tumutuu su umba impetuu kiw te Megbevayà su egkesuatan din he melinawen is kedepitè tew. <sup>16</sup>Kinahanglan he edtugutan ta he edsuwey is esawa ta he kenà tumutuu su minsan ke kenè ta edtugutan kenè ta gihapun egketuenan ke pinaagi kenita edtuu keuzemà sikandin te Nengazen wey ke kenà.

### **Is Kebpekesavuk te Etey Zutun te Kebpeketuu Zin**

<sup>17</sup>Ne minsan hengkey is kebpekesavuk te kada sevaha kenitew zini te kelibutan, kinahanglan he edtumanen te kada sevaha is ebpeveelan kandin te Megbevayà sumalà ke hengkey is kebpekesavuk din dutun te kebpetuuwa kandin te Nengazen tew. Ibpenerù ku heini te menge tumutuu ziyà te minsan hendei he inged. <sup>18</sup>Penenglitàn, ke zuen tumutuu he zaan he nesirkunsidar su wey metuusi he Hudiyu sikandin, ne iyan sambag ku kandin is kenè din ipaawà is tuus te kedsirkunsidara kandin. Ne iring din ded daan is etew he kenà Hudiyu zutun te kebpeketuu zin, kinahanglan he kenà sikandin ebpesirkunsidar. <sup>19</sup>Su minsan ke nesirkunsidar ki wey ke wazà ne wazè din pulus. Iyan, ke edtumanen ta is ebpeveelan kenitew te Megbevayà, ne zekelà is pulus din kenitew. <sup>20</sup>Ipelaus niw en haazà is kebpekesavuk niw puun dutun te aney he kebpetuuwa keniyu te Nengazen tew. <sup>21</sup>Emun uripen ka zutun te

kebpeketuu nu, ne maambe en, iyan, ke egkehimu he ebelukasan ka ne meupiya pa haazà, pevelukas ka. <sup>22</sup>Minsan ke uripen ka zutun te kedhimuwa kenikew he tumutuu te Nengazen, iyan ked-ahaa zin kenikew is kenè ka uripen. Ne iring din ded daan, minsan pa ke kenè ki uripen, emun tumutuu ki te Nengazen ne uripen ki gihapun ni Kristu. <sup>23</sup>Uteu mahal is imbelukas kenitew te Megbevayà ne tenged kayi kinahanglan he kenè niw iyan sundani is etew zà duen, kekenà, iyan is Nengazen. <sup>24</sup>Menge suled, minsan hengkey is kebpekesavuk niw zutun te kebpeketuu niw te Nengazen ne kinahanglan he kenè niw helina su iyan metau is Megbevayà.

### Is Ketudluanan Mehitenged te Wazè Din Esawa

<sup>25</sup>Ne sikiyu zaan is wazè pa esawa, wazè ku sugù keniyu he ebpuun te Nengazen, iyan, siak is nehimu he egkeserigan tenged te zekelà he hizu kediey te Megbevayà, duen sambag ku keniyu. <sup>26</sup>Iyan is: geina te utew mezakel is kemeregenan tew te menge tumutuu kayi te timpu, meupiya ke kenè kew ebpees-eseweey. <sup>27</sup>Ke zuen etew he wazè din esawa ne kenè din pen-ahaa is ed-esewaan din, iyan, ke zuen daan etew he zuen din en esawa ne kenè din engkezi. <sup>28</sup>Ne emun ebpengesawa is maama ne kenà daan salà haazà ne emun ebpeesawa is bahi ne iring din ded daan su kenè man salà. Iyan dà igkekegiya ku he meupiya ke kenè kew ebpees-eseweey su emun ebpees-eseweey kew ne meregen is egkeulaula niw zini te kelibutan ne egkesuatan ku pezem he kenè niw mesegazi is iring dutun.

<sup>29</sup>Su ibpesavut ku keniyu, menge suled, he mevavè dà utew is timpu tew ne tenged kayi, puun guntaan is etew he zuen esawa zin, ne kinahanglan he tumana zin is ebpeveelan kandin te Nengazen he iring te wazè din esawa. <sup>30</sup>Ne iring din ded daan haazà is etew he egkeseeng, ne kinahanglan he iring te wazè din igkeseeng. Ne iring din ded daan is etew he zuen din igkelipey su kinahanglan he iring te wazè din igkelipey. Ne haazà daan is menge etew he ebpememasa, kinahanglan he kenè dan kenuguni is ebpemesahan dan, kekenà, isipa zan he kenà kandan haazà. <sup>31</sup>Kinahanglan he ke egemiten ta is menge vutang dini te kelibutan, kenè ta utew edekelaan dini te gehinawa ta. Umba egkekegiyen ku heini su megaan en egkehanew is kelibutanen he kebpekesavuk tew guntaan.

<sup>32</sup>Egkesuatan ku pezem he wazà utew mezakel he kelibutanen he igkesemuku keniyu. Is maama he wazè din esawa, iyan dà seeng din is kedtumana zin te ebpeveelan kandin te Nengazen su iyan din ed-isipen layun is egkesuatan te Nengazen. <sup>33</sup>Iyan, is maama he zuen din esawa, layun din daan ed-isipen is menge igkeseeng dini te kelibutan su wey mesuat is esawa zin. <sup>34</sup>Ne tenged kayi layun dezuwa is ed-isipen din, ne kenà egkeuyun heini is dezuwa. Ne iring din ded daan is bahi he wazè

din esawa su iyan dà ed-isipen din is egkesuatan te Megbevayà. Ibegey zin is gehinawa zin wey zesen din su wey mesuat is Megbevayà. Iyan, ke zuen esawa zin, egkeisip din layun is menge igkeseeng dini te kelibutan su wey mesuat is esawa zin.

<sup>35</sup>Kenè ku iyan igkegiya kayi is wey kew kenà meked-eeseweey, kekenà, egkesuatan ku he mesembagi kew su wey metengkai is menge ulaula niw ne wey kenà mesanggan is hustu he kedtumana niw te ebpeveelan keniyu te Megbevayà.

<sup>36</sup>Ke zuen maama he zuen din anak he raga he megurang en ne egkeregenan haazà is raga su wazà itugut dutun te amey zin he ebpeesawa, ne zeyzey ke ibpeesawa zin emun iyan egkesuatan din su kenè man salà is iring dutun. <sup>37</sup>Iyan, ke wazà meregeni haazà is raga ne maambe en ke kenè din ibpeesawa su zeyzey heini, asal, egkehimu zin is diyà te gehinawa zin. <sup>38</sup>Meupiya ke ibpeesawa zin haazà is anak din, iyan, meupiya zaan ke kenè din ibpeesawa.

<sup>39</sup>Ne ke zuen bahi he zuen esawa zin, kenà egkehimu he edsuwayan din haazà is esawa zin. Iyan, emun ebpatay is esawa zin, ne egkehimu ke ebpeesawa sikandin ebpeuman te egkesuatan din he maama, iyan, kinahanglan he iyan ebpekesawa kandin is tumutuu te Nengazen tew. <sup>40</sup>Iyan, meupiya pa is kebpekesavuk dutun te vahi ke kenè en sikandin ebpeesawa. Kediey zà he isip heini, iyan, edtuuwan ku he impinted kediey heini te Wagas he Mulin-ulin.

### Is Ketudluanan Mehitenged te Impemuhat Diyà te Kenà Tutuu he Megbevayà

**8** <sup>1</sup>Ne mehitenged te insè niw ke idtugut be kenitew te menge tumutuu ke egkeenen tew is usa he impemuhat diyà te menge tarù he ed-ezapan, netuenan tew te langun he heini is menge tarù he ed-ezapan ne wazè dan gehem kenitew. Ne minsan ke netuenan ta he wazà gehem dan kenita, egkehimu he ebpegalbu ki tenged kayi te netuenan ta emun wazà heini metueni te menge zuma ta. Umba egkegiyen ku heini su kenè ki ebpeketavang te menge zuma ta pinaagi zà te netuenan ta, kekenà, pinaagi te gagew ta kandan. <sup>2</sup>Is etew he kunaan din ke zekelè en is netuenan din, is hustu he ibpesavut pezem kandin te Megbevayà, wazè din pa metueni. <sup>3</sup>Ne haazà mulà is etew he mahal ziyà te gehinawa zin is Megbevayà, iyan sikandin kes migkagi te Megbevayà he gaked din.

<sup>4</sup>Ne mehitenged te kegkaan te usa he impemuhat duen te menge tarù he ed-ezapan, netuenan tew he kenè man Megbevayà is iring dutun su sebsevaha zà is tutuu he Megbevayà. <sup>5</sup>Mezakel utew is menge tarù he megbevayà he ed-ezapan te menge etew ne egkegiyen te menge etew he ziyà ed-ubpà haazà is menge megbevayà te langit wey zini te tanà, ne edhimuwen dan he menge ziwata zan wey menge egalen dan. <sup>6</sup>Ne

minsan pa zutun, sikitew, netuenan tew mulà he sebsevaha zà is kenitew he Megbevayà he iyan Amey tew he nenlimbag te minsan hengkey. Iyan sikandin edlingahaan tew te minsan hengkey he timpu. Ne sebsevaha zà daan is Nengazen tew he iyan si Jesu Kristu. Pinaagi kandin nelimbag is minsan hengkey, ne pinaagi zaan kandin mibegayan kiw en te vegu en he untung.

<sup>7</sup>Iyan, duen menge zuma tew he tumutuu he wazà mesayud he wazà gehem te tarù he Megbevayà diyà te kandan. Ne utew meregen kandan is ked-ewai zan te imbilinbilin kandan he tuluuwen mehitenged te tarù he megbevayà. Ne emun egkaan dan te egkeenen he impemuhat, iyan egketagù te isip dan he neketampu zan dutun te ked-ezapa te tarù he megbevayà. Ne tenged kayi ebpekezezaat te gehinawa zan su kunaan dan ke nekesalè dan su nekekaan dan te usa he impemuhat diyà te tarù he megbevayà. <sup>8</sup>Ne sikitew, netuenan tew he kenà iyan is egkeenen tew wey is kenè tew egkeenen igkesuat te Megbevayà su emun egkaan ki te usa ne wazè din pulus diyà te Megbevayà ne emun kenè ki egkaan te usa ne iring din ded daan.

<sup>9</sup>Ne minsan pa zutun kinahanglan he purungi niw isipa heini is intugut en keniyu su kela ke tenged keniyu egkesanggen is kedtuu te sevaha he wazè pa sikandin mekesavut te hustu. <sup>10</sup>Su penenglitan, ke zuen duma ta he wazà sikandin mekesavut te hustu, ne sikita is nekesavut mulà, neehè ki zin is egkaan dutun te valey he zutun ed-ezapen is tarù he megbevayà, ne egkeuwit sikandin ne edtampu zaan sikandin he egkaan, iyan, egkepenulayan is isip din su kunaan din ke tutuu he ed-ezapen haazà is ed-ezapen dan dutun. <sup>11</sup>Ne tenged te nesavut ta he kenà tutuu he ed-ezapen haazà is mibpemuhatan, nezeetan heini is duma ta he midlibri te silut pinaagi te kebpatay ni Kristu. <sup>12</sup>Ne emun pinaagi kayi te ulaula ta ebmesakit is gehinawa te menge zuma ta he tumutuu, nekesalè ki ziyà te kandan ne nekesalè ki zaan diyà te ki Kristu. <sup>13</sup>Ne emun egkehimu he egkepenulayan is duma ku he tumutuu pinaagi te kegkaan ku te usa, ne kenà ad maan te minsan keenu egkaan te usa.

### Is Ketengdanan te Epustul

**9** <sup>1</sup>Intugut kedì he iyan a ebayàbayà te ebeelan ku su zuen ku kegehem te kegkeepustul. Iyan inggerari kedì he epustul su mibpaahà kedì dengan si Jesus is Nengazen tew. Ne kenà dutun dà taman su pinaagi kedì nemeketuu kew te Nengazen. <sup>2</sup>Ne minsan ke kenà ebpeketuu is duma he epustul a, sikiyu is diyana te Kurintu, netuenan niw en he epustul a su kenà egketarù he pinaagi kedì mibegayan kew en te vegu en he untung. <sup>3</sup>Ne is menge etew he egkesuat he edsusi te menge ulaula ku iyan tavak ku kandan is: <sup>4</sup>mezaat be ke ebuyuen ku is egkeenen ku wey ed-inumen ku ziyà te menge tumutuu he ebpekezawat



te ibpenurù ku? Kenà mezaat. <sup>5</sup>Ne mezaat be zaan ke ed-iringan ku is menge zuma he epustul wey is menge hazi ni Jesus wey si Pedro zaan su pudu zan duen esawa he tumutuu he edumahan dan ke edhipanew zan? Kenà daan mezaat. <sup>6</sup>Ne egkehimu ve he iyan key zà ki Bernabe wazè din ketenged te kebuyù te igkeuyag dey ziyà te ebpekezawat te menge penurù dey? <sup>7</sup>Penenglitan, is sundaru, egkehimu ve ke kenà sikandin ebegayan te egkegastu zin? Kenà egkehimu. Kenà daan egkehimu he kenà ebpekekaan is tegipinemula zutun te vegas te pinemula zin. Ne iring din ded daan is ed-elima te kerehidu su zuen din egkepupulus tenged dutun.

<sup>8</sup>Menge ketezengan heini he zini zà ebpuun te menge ulaula tew te menusiyà, iyan, iyan gihapun ibpenurù te kesuguan. <sup>9</sup>Su insugù dengan ni Moises he, “Is ibpegunas he vaka, ne kinahanglan he kenè niw ebusalan.” Ne kenè ta ed-isipen he iyan dà egkegiyen te Megbevayà kayi is menge vaka, <sup>10</sup>su siguradu elin key zaan egkegiyen din dutun. Su umba edhagù is edadu wey is ed-egani su ebpeebuten te uman sevaha kandan he zuen egkekuwa zan dutun te abut te tanà. <sup>11</sup>Ne iring din daan, is impemula zey ziyàn te keniyu, ne zuen pulus din te wazà pidtemanàn. Ne kenè be egkehimu he zuen ebpeebuten dey ziyàn te keniyu he igkeuyag dey he kayi zà te kelibutan is pulus din? <sup>12</sup>Su ke egkehimu ke zuen ebpeebuten he igkeuyag te menge zuma he ebpenurù diyan, iyan key pe be kenà mebpaabut daan te lavew pa he zekelà.

Ne minsan pa te iyan heini ketezengan, wazè key mebuyù diyan te keniyu su kela ke zuen egkagi he ibpenapì dey zà is baal zey ziyàn. Ed-entusen dey is minsan hengkey su kenè dey egkesuatan he mesanggan is kedsengyawa te Meupiya he Tudtulanen mehitenged ki Kristu. <sup>13</sup>Siguradu netuenan niw he haazà is menge etew he ebaal ziyà te simbahan he Valey te Megbevayà, ne zutun dan egkuwaa is egkeenen dan. Ne is menge memumuhat daan he ebpemuhat dutun, ne egkezawat dan daan is bahin dan dutun te impemuhat. <sup>14</sup>Ne iring din ded daan is intelaan dengan te Nengazen tew su migkagi zin he kinahanglan he edsuhulan is ebpenurù te Meupiya he Tudtulanen te menge ebpepenurù kandin.

<sup>15</sup>Ne minsan pa te egkehimu he egkekuwa ku is igkeuyag ku zutun te ebpepenurù kedì, wazà a mebuyù diyà te minsan hentei. Ne kenà a zaan ebuyù guntaan diyan te keniyu. Deyzey pa ke egkeumes a te vitil kenà te mekevuyù a su utew ku egkesuati he kenà maawà is igkezantal ku he iyan is: wazè ku mesanggan is kedsengyawa te Meupiya he Tudtulanen. <sup>16</sup>Ne kenà egkehimu he idantal ku is kedsengyawa ku te Meupiya he Tudtulanen su intelaan kedì te Nengazen heini, ne kenà egkehimu he kenè ku edtumanen. Mevegat is silut din kedì ke kenè ku idsangyew is Meupiya he Tudtulanen. <sup>17</sup>Emun kediey zà he isip is kedsengyawa ku, ne egkehimu he edsuhulan a, iyan, geina te intelaan kedì te Megbevayà tenged te suluguen e zin dà ne kinahanglan he edtumanen ku tenged dà te insarig

din heini kediey. <sup>18</sup>Ne hengkey ve is suhul ku kayi? Iyan suhul ku kayi is: egkehimu he ibpesavut ku is Meupiya he Tudtulanen te wazà bayad diyà te minge etew minsan pa te zuen ku ketenged te kebuyù te igkeuyag ku.

<sup>19</sup>Ne kenà duen dà taman su minsan pa te kenà dait he edsugsuguen a te minsan hentei su kenè e man uripen te minsan hentei, egkesuatan ku he mehimu a he suluguen te minsan hentei su wey mehimu he meketuu ki Jesus is utew mezakel he minge etew. <sup>20</sup>Ne tenged kayi emun diyà a te minge Hudiyu, ne hinudiyu zaan dutun is minge ulaula ku su wey maagak sikandan ne meketuu sikandan. Ne minsan pa te kenè e en dizalem te kesuguan he imbilinbilin ni Moises diyà te minge Hudiyu, edtumanen ku gihapun su wey ku maagak sikandan ne ebpeketuu sikandan ki Jesus. <sup>21</sup>Ne ziyà te minge etew he kenà minge Hudiyu, emun iyan sikandan minge zuma ku ne kenè ku en maan ed-ul-ulahan is kesuguan he ebentayan te minge Hudiyu su ed-ul-ulahan ku is minge ulaula te kenà minge Hudiyu su wey ku sikandan maagak ne ebpeketuu zan ki Jesus. Wazè ku engkezi is minge sugù te Megbevayà su edtumanen ku is minge sugù ni Kristu. <sup>22</sup>Ne haazà is minge tumutuu he wazà sikandan mekesavut te hustu, egkehimu a he iring kandan ne kenè ku idtegel is kediey he egkesuatan su wey pinaagi kedì meheget is kedtuu zan. Ne zuen te kada sevaha he ebpenudtulan ku te Lalag te Megbevayà, ebpen-ahaan ku is paagi he engayan kandin su wey ku maagak sikandin ne ebpeketuu sikandin ki Jesus.

<sup>23</sup>Umba ebeelan ku heini su wey mesangyew is Meupiya he Tudtulanen ne wey a zaan mekeambit te minge tuvad he impenaad kenitew pinaagi te Meupiya he Tudtulanen. <sup>24</sup>Netuenan niw he ke zuen lumbaan ne mezakel is ebpekibanggà, iyan, sevaha zà is ebpekezaag ne iyan edsuhulan. Ne sikiyu is tumutuu ki Jesus, iringi niw is edlumbà su wey kew mesuhuli keuzemà te Megbevayà. <sup>25</sup>Ne sikan is idlumbà, edhagù sikandin su wey melumbad is lawa zin. Iyan id-ul-ulaha zin kayi su wey zin mezawat is suhul he melemu egkeawà is pulus din. Ne sikitew is tumutuu, edhagù kiw zaan kayi te kedsundan tew te Nengazen su wey tew mezawat is suhul he kenà mulà egkeawà is pulus din te wazà pidteman. <sup>26</sup>Umba ed-iringan ku is idlumbà he edlelagdeng diyà te edungguan su kenà a ed-awà kayi te hustu he ibayà. Ne kayi te kebpenurua ku te minge etew, ed-iringan ku zaan is beksidur he pirmi ebpekesugat is sumbag din su wey layun mekesugat is minge lalag ku. <sup>27</sup>Ne heini is lawa ku, ke zuen mezaat he suat din, ne edhimuwen ku is taman te egkehimu ku su wey ku meegen su kela ke, siak is nekepenurù te zuma, ne iyan a kenà egkesuhulan keuzemà te Megbevayà.

### Menge Petizaan

**10** <sup>1</sup>Egkesuatan ku, minge suled, he metueni niw ke hengkey is neulaula zengan te minge kepuun dey te minge Hudiyu he nemenduma

ki Moises. Su mibpeyungan sikandan te gapun he iyan tuus he mibulus diyà te kandan is Megbevayà, ne midrapas dan is dagat he migngezanan te Merigà, ne wazà nelened kandan. <sup>2</sup>Ne heini is neulaula zan, ne iring te nebewtismuwan sikandan pinaagi zutun te gapun wey zagat su wey zan mekesundan ki Moises. <sup>3</sup>Ne sikandan is langun, ne nekekaan dan te egkeenen he imbegey te Megbevayà <sup>4</sup>ne nekeinum dan te inumen he imbegey zin daan su is langun te sikandan, ne nekeinum te wahig he ebpuun diyà te watu he impaahà kandan te Megbevayà. Ne haazà is batu, ne iyan si Kristu he kenà edsuwey kandan. <sup>5</sup>Ne minsan pa te zekelà is tavang kandan te Megbevayà, wazà ikesuat te Megbevayà is ulaula te kezekelan kandan, ne tenged kayi nemematey zan dutun te tanà he mezelay ed-uzani he imbayè dan.

<sup>6</sup>Umba nehitavù diyà te kandan heini is langun su wey kiw meleguyi ke hengkey is egkehitavù kenitew ke egkesuatan tew te ed-ulaula is iring te mid-ulaula zan he mezaat. <sup>7</sup>Kenè tew ed-ezapan is kenà hustu he ed-ezapan he iyan ulaula zan dengan su zuen insurat he Lalag te Megbevayà he edhenduen te, “Mid-erungutan dan su egkeenen dan wey ed-inumen dan is impemuhat dan, ne neipus haazà ne midsayew zan.” <sup>8</sup>Ne elin daan mid-ulaula zan dutun is egkevuten dan is kenè dan esawa. Ne sikitew, kenè tew heini ed-iringan su midsilutan sikandan te Megbevayà ne keluwaan wey tetelu he libu is nemematey kandan te sengeandew zà. <sup>9</sup>Ne kenè tew zaan egezaman is ked-entusa kenitew te Megbevayà su iyan heini mid-ulaula te zuma kandan ne iyan silut kandan dutun is: mibpendunghul sikandan te menge uled ne nemematey zan. <sup>10</sup>Ne kenè tew zaan edtemudmuzan is menge egalen he imbegey kenitew te Megbevayà su iyan mid-ulaula te zuma kandan ne zutun duen belinsuguen he midsugù te Megbevayà he ibpehimatey kandan.

<sup>11</sup>Umba neulaula heini is langun su wey metueni te langun he kenà iyan haazà ulaula he egkesuatan te Megbevayà. Ne insurat daan heini su wey ikepenurù kenitew he edsilutan te Megbevayà is ed-ulaula te iring kayi. Su sikitew, megaan tew en egkeumahi is kegketuman te langun he nengetagnà dengan.

<sup>12</sup>Ne tenged kayi, haazà is etew he egkeisip din he mezesen en is kedtuu zin, ne kinahanglan he purungi zin pa hegeta is kedtuu zin su kela ke mekesalà sikandin gihapun. <sup>13</sup>Is minsan hengkey he ibpenuley kenita ni Setanas, ne kenà begu su layun din en ibpenuley te menusiya is iring dutun. Iyan, egkeserigan ta is Megbevayà su kenè din idtugut he ebpenulayan ki te subra te egkeantus ta. Layun din ibegey kenitew is kelig-en su wey zuen paagi te kedlikayi ta he kenè ki mekeulaula te mezaat.

### Is Ked-azap te Kenà Tutuu he Megbevayà wey Sikan is Kedlavung te Nengazen

<sup>14</sup>Ne tenged kayi, menge suled, likayi niw is ked-ezapa te kenà tutuu he megbevayà. <sup>15</sup>Sikiyu, ne metau kew he ed-isip, umba, isipa niw heini

is egkegiyen ku. <sup>16</sup>Sikitew is minge tumutuu, emun edtigum kiw su edtumanen tew is kedtenuzi te kebpatay ni Kristu, duen ed-inumen tew he ebpeelematan tew te Megbevayà. Tuus heini he mibpelisan kiw en te lengesa ni Kristu. Ne is supas he ebpenebtevien tew ne egkeenen tew, kebpekeambit tew heini te lawa ni Kristu. <sup>17</sup>Ne geina te sevaha zà is supas he iyan si Kristu, minsan pa ke mezakel kiw, nesevaha kiw gihapun su pudu kiw ebpekekaan dutun te sevaha he supas.

<sup>18</sup>Isipa niw is ulaula te minge Hudiyu su is kada sevaha kandan he egkaan duen te impemuhat duen te vangkù diyà te etuvangan te Megbevayà, ne pinaagi te kegkaan dan nekelapik en sikandan te ked-azap te Megbevayà. <sup>19</sup>Iyan ibpesavut ku kayi is: baal zà te etew is ledawan he ed-ezapan te minge etew ne ke zuen egkeenen he ibpemuhat dutun, ne egkeenen dà duen su kenà tutuu he ed-ezapan haazà is ledawan. <sup>20</sup>Ne minsan pa zutun kenà iyan dà ed-ezapan dan dutun is ledawan, kekenà, elin is minge mezaat he mulin-ulin, kenà iyan is tutuu he Megbevayà. Ne kenè ku egkesuatan he mekelapik kew te ed-azap te minge mezaat he mulin-ulin. <sup>21</sup>Sikitew is tumutuu, emun edtuman ki en duen te intelaan he Idlavung te Nengazen, ne kenà egkehimu he ed-inum ki wey egkaan ki zaan duen te impemuhat te kenà minge tumutuu ziyà te minge mezaat he mulin-ulin su ebpekeiring te zuen tew kebpekid-upakat te minge mezaat he mulin-ulin. <sup>22</sup>Ne kenà meupiya he mepauk kenitew is Nengazen. Kunaan niw vuwa ke ebpekesukul kew kandin.

### Is Kelibriyanan te Minge Tumutuu

<sup>23</sup>Egkehimu, kun, he ed-ul-ulahan tew is minsan hengkey he meupiya. Ne venar iyan heeyan. Iyan, bahin kediey, iyan egkekagi ku is: mezakel is kenà meupiya he ed-ul-ulahan su kenà ebpeketavang. Minsan pa te egkehimu he ed-ul-ulahan tew is minsan hengkey, mezakel is ed-ul-ulahan he kenà ebpekeheget te kedtuu te minge zuma tew. <sup>24</sup>Ne kinahanglan he kenè tew iyan dà ed-isipen ke hengkey is igkezeyzey te kenitew zà he keugelingen he kebpekesavuk, kekenà, kinahanglan he ed-isipen tew zaan ke hengkey is kegkepurungi tew te minge zuma tew.

<sup>25</sup>Na. Egkehimu he egkeenen ta is minsan hengkey he usa he imbelegyà diyà te mirkadu, iyan, kenè ta id-insà ke impemuhat be wey ke wazà su wey wazà ibmesakit te gehinawa ta ke egkeenen ta. <sup>26</sup>Umba egkegiyen ku heini su zuen insurat he Lalag te Megbevayà he edhenduen te, “Is tivuuk he kelibutan wey is langun he tagù din, ne azen te Megbevayà.”

<sup>27</sup>Ne ke zuen etew he wazà medtuu te Nengazen tew ne ibpekaan ke zin diyà te valey zin ne ke edhendiyè ka, egkehimu he egkeenen nu is idhenat din kenikew zutun, asal kenè nu iinsà ke impemuhat be wey ke wazà su wey kenà ibmesakit haazà te gehinawa nu ke ingkepemuhat

haazà. <sup>28,29</sup>Iyan, ke zuen tumutuu he egkagi te, “Impemuhat heini is idsezè ta te ledawan,” ne kenè ka zutun kaan te idsezà su kela ke egkelenew sikandin he egkaan duen, ne ibmesakit te gehinawa kayi te zuma nu he tumutuu ke egkeenen nu haazà.

Ne siguradu zuen ebpekeinsà te, “Emun egkehimu he ed-ul-ulahan ku is minsan hengkey, maan is edlikayan ku is ulaula he kunaan ke mezaat te minge etew he wazà mekesavut te hustu? <sup>30</sup>Penenglitan,” ke sikandin, “ke ebpeselematan ku te Megbevayà is egkeenen ku, maan is egkegiyen te zuma he mezaat he ulaula is egkeena ku te mibpeselematan ku?”

<sup>31</sup>Ne iyan tavak ku zutun is: minsan hengkey he ed-ul-ulahan niw, te kegkaan niw wey te ked-inum niw, ne kinahanglan he iyan id-ul-ulaha niw zutun su wey mezalig is Megbevayà tenged te ulaula niw. <sup>32</sup>Tenged kayi, kinahanglan he wazà minsan hengkey he ulaula niw he ibmesakit te gehinawa te minsan hentei he etew, Hudiyu se kenà Hudiyu wey minge zuma niw he tumutuu te Megbevayà. <sup>33</sup>Siak, ebpen-ahaan ku layun is paagi su wey meketavang te minsan hentei is minge ulaula ku. Kenè ku iyan ebpen-ahaan is kediey he igkezeyzey, kekenà, iyan is igkezeyzey te langun he minge zuma he etew. Umba ebeelan ku heini su wey meketuu sikandan ne melibri sikandan te silut.

**11** <sup>1</sup>Ne tenged dutun, minge suled, iringi niw is ed-ul-ulahan ku, iring te ed-iringan ku zaan is mid-ulaula zengan ni Kristu.

### Is Hustu he Ed-ul-ulahan te Kedsimba

<sup>2</sup>Duen ed-ul-ulahan niw he layun ku egkegiya he utew meupiya he iyan is: wazè a keniyu melipati ne is impenurù ku keniyu ne edtumanen niw layun. <sup>3</sup>Ne zuen ku pa ibpesavut keniyu. Iyan is: iyan ebayàbayà te maama si Kristu. Ne is maama, ebeyveyaan din is esawa zin ne iyan ebayàbayà ki Kristu is Megbevayà. <sup>4</sup>Ne tenged kayi, ke edtigum kew ziyà te simbahan ke zuen maama he ed-ampù wey ke edseysayen din be is impesavut kandin te Megbevayà, kinahanglan he puwasa zin is kalù din ke egkekalù sikandin su emun kenè din ebpuwasen haazà ne henduen be te kenà iyan si Kristu is ebayàbayà kandin. <sup>5</sup>Ne ke zuen bahi he ed-ampù, wey ke edseysayen din be is impesavut kandin te Megbevayà, ne kinahanglan he zuen lembung te ulu zin su emun wazà, ne utew heini igkeeled te esawa zin he ebayàbayà kandin. <sup>6</sup>Su emun wazà lembung te ulu zin ne zeyzey ke ebengulan sikandin. Ne utew igkeeled te vahi ke ebpealut wey ke ebengulan. Ne emun egkeeled sikandin he ebengulan kinahanglan he zuen lembung te ulu zin. <sup>7</sup>Is maama mulà, ne kenà kinahanglan he egkekalù ke ed-ampù su alung sikandin te zagwey wey gehem te Megbevayà. Ne is bahi, alung sikandin te zagwey te maama.

<sup>8</sup>Umba egkegiyen ku heini su haazà is nehuna he maama, ne wazà ianak te vahi, kekenà, midlimbag te Megbevayà. Ne haazà is nehuna

he vahi, ne mibeelan te Megbevayà puun duen te lawa te nehuna he maama. <sup>9</sup>Ne iyan inlimbaga te Megbevayà te maama su kenà te wey zuen дума te vahi, kekenà, midlimbag din is bahi su wey zuen дума te maama. <sup>10</sup>Ne tenged kayi kinahanglan he zuen lembung te ulu te vahi su wey metueni te minsan menge velinsuguen te Megbevayà diyà te langit he ebpezumazuma is bahi te egkegiyen te esawa zin. <sup>11</sup>Ne minsan pa zutun, sikitew is menge tumutuu te Nengazen, maama wey se vahi, ne ebpeserigerigè kiw. Ebpetavang is maama te vahi ne ebpetavang daan is bahi te maama. <sup>12</sup>Su minsan pa ke ebpuun is nehuna he vahi zutun te lawa te nehuna he maama, iyan, guntaan id-anak is maama te vahi, asal, diyà ebpuun is minsan hengkey te Megbevayà.

<sup>13</sup>Isipa niw man ke hengkey is meupiya. Netuenan niw en he kenà meupiya ke zuen bahi ziyà te simbahan he ed-ampù he wazà lembung te ulu zin. <sup>14</sup>Su puun pa te zengan dà ne netuenan tew he utew igkeeled te maama ke melayat is bulvul zin he iring te vahi. <sup>15</sup>Iyan, ke melayat is bulvul te vahi ne utew haazà meupiya he ed-ahaan. Umba imbegey kandin te Megbevayà is melayat he vulvul su wey mekelembung te ulu zin. <sup>16</sup>Ne ke zuen minsan hentei he kenè din edewaten is kedì he sambag kayi ne iyan tavak ku is: wazà дума he vetasan he ibpenurù dey. Ne is menge zuma he tumutuu ziyà te minsan hendei he inged, ed-ul-ulahan dan daan heini ke edsimba zan.

### Is Kedlavung te Nengazen

<sup>17</sup>Ne zuen pa egkegiyen ku keniyu, ne iyan is: kenè ku egkesuatan is ulaula niw emun edtigum kew su kenà egkeheget is kedtuu niw pinaagi te kedtigum niw, kekenà, henduen be te egkehugkà. <sup>18</sup>Nezineg ku he emun edtigum kew egkengevahinbahin kew ziyàn ne ebpekunkuntedehè kew. Ne malu a kayi ebpeketuu. <sup>19</sup>Kinahanglan buwa he iyan heini egkehitavù keniyu ziyàn su wey metueni ke hentei keniyu is egkeserigan te Megbevayà. <sup>20</sup>Heeyan is kedtigum niw te kegkaan, kenà iyan paagi te kedtumana te Idlavung te Nengazen. <sup>21</sup>Umba egkegiyen ku heini su zuen kun дума keniyu he legezen ne edhuna zan kun egkaan ne kenè dan edsemaan is menge zuma zan ne tenged dutun egkengevitil is дума. Ne kenà iyan dà haazà su ebpemelelangut is дума! <sup>22</sup>Maan is kenè kew ziyà egkaan te menge valey niw? Tenged keniyu te menge legezen egkengeeled is menge zuma niw he egkeayuayu ne egkezeetan niw is dengeg te tivuuk he tumutuu ziyàn. Kunaan niw vuwa ke kenà utew ku igkeepes is ulaula niw he iring kayi! Kenè ku iyan egkesuatan is mid-ulaula niw. <sup>23</sup>Umba egkegiyen ku heini su is impenurù kediey te Nengazen, ne iyan daan impenurù ku diyàn te keniyu. Iyan is: dutun te kezukileman te ked-ekali te Nengazen tew he si Jesus, hein edlavung dan, ne migkuwa ni Jesus is supas, <sup>24</sup>ne mibpeselematan din

te Megbevayà, ne mibpenevitevi din ne ke sikandin te, “Iyan heini lawa ku he ibpemuhat wey kew melibri te silut. Layun niw heini keena te iring kayi he paagi su wey a keniyu kenà melipati.” <sup>25</sup>Ne zutun hein nekekaan dan en, migkuwa ni Jesus is tasa he nepenù te inumen ne ke sikandin en maan te, “Heini is inumen, ne tuus te vegu en he paagi te kegkelibri he midtukud te Megbevayà ne egkehimu heini pinaagi te lengesa ku he ibpaagas. Ne emun ed-inumen niw heini is inumen te minsan keenu he timpu isipa a keniyu,” ke si Jesus. <sup>26</sup>Ne taman te kenè pa ebpekelikù is Nengazen tew he si Jesus, emun ed-inumen niw heini is inumen wey egkeenen niw heini is supas, igkepeehè niw is kedsarig niw te kebpatay zin.

<sup>27</sup>Ne ke zuen egkaan kayi te supas te Nengazen ne ed-inum kayi te inumen din ne kenè din idtagù diyà te gehinawa zin ke hengkey is tutuu he kehulugan kayi, ne nekesalè en sikandin diyà te Nengazen tew su wazè din tehuza is lawa wey is lengesa te Nengazen. <sup>28</sup>Ne tenged dutun kinahanglan he susiya te kada sevaha is kandin he gehinawa ke tutuu ve is kedsarig din te kebpatay ni Jesus ne human egkehimu he egkaan wey ed-inum sikandin. <sup>29</sup>Su ke wazè din isipa he alung te lawa wey lengesa ni Jesus haazà is ed-inumen din wey egkeenen din ne edsilutan sikandin te Megbevayà. <sup>30</sup>Iyan heini hinungdan ke maan is egkezeruwan is mezakel keniyu. Mezakel zaan diyan is menge meluya is lawa zan ne mezakel zaan is nemematey su silut te Megbevayà. <sup>31</sup>Emun edsusiyen ta is kenita he gehinawa, kenè ki en edsilutan te Megbevayà. <sup>32</sup>Iyan, is Megbevayà, edsusiyen kiw zin guntaan is menge tumutuu ne edsilutan kiw zin su wey kiw mepenurù. Ne zutun kenè kiw zin en egkesilutan keuzemà ragkes te menge kelibutanen he etew he wazà medtuu kandin.

<sup>33</sup>Na, menge suled ku, emun edtigum kew te kegkaan te Idlavung te Nengazen, tegazi niw is menge zuma niw. <sup>34</sup>Ne ke zuen egkevital, kinahanglan he ziyà sikandin mebpekehantey te valey zin su wey kenè kew mesiluti te Nengazen ke egkesupak niw is intelaan din mehitenged dutun te kedtigum niw.

Ne zuen pa zuma he selembagan ku keniyu, ne wey ku en heini edseysaya ke ebpekeuma a zian.

### Is Menge Ketau he Imbegey te Wagas he Mulin-ulin

**12** <sup>1</sup>Menge suled, egkesuatan ku he mepurung niw mesavut ke hengkey sikan is menge ketau he imbegey keniyu te Wagas he Mulin-ulin. <sup>2</sup>Netueanan niw he zengan te wazè kew pa meketuu ki Jesus ne zuen ebpengelintau keniyu he mekeazap kew te menge ledawan, ne pinaagi kayi te menge wazè dan gehinawa he ledawan ne layun egketazin dengan is menge isip niw. <sup>3</sup>Ne tenged kayi ibpesavut ku zaan keniyu he ke zuen etew he ed-ulinan te Wagas he Mulin-ulin, kenà egkehimu he

egkegiyen din he zait he edrewaken si Jesus, ne iring din ded daan kenà egkehimu he egkegiyen din he Nengazen din si Jesus emun kenà pinaagi te ked-ulini kandin te Wagas he Mulin-ulin.

<sup>4</sup>Ne haazà is menge ketau he ibegey kenitew te Wagas he Mulin-ulin, ne kenà ed-iiring-iring, iyan, sevaha zà is puunè dan he iyan is Wagas he Mulin-ulin. <sup>5</sup>Ne kenà daan ed-iiring-iring is ebpeveelan te Megbevayà te kada sevaha kenitew, iyan, umba edtumanen tew su wey tew mepenunuat sikandin is sebsevaha zà he Nengazen. <sup>6</sup>Sikitew is tumutuu, mezakel is ebpeveelan kenitew, iyan, iyan ed-ulin te kada sevaha kenitew is Megbevayà wey mehimu te kada sevaha is ebpeveelan kandin. <sup>7</sup>Ne kada sevaha kenitew te menge tumutuu, ne zuen imbegey kandin he ketau he iyan tuus he mid-ulinan sikandin te Wagas he Mulin-ulin. Umba imbegey haazà diyà te kandin su wey zin metevangi is menge zuma zin he tumutuu. <sup>8</sup>Ne ziyà te zuma ibegey pinaagi te Wagas he Mulin-ulin is ketau te kedseysey te tutuu he tuluuwen; ne ziyà te zuma pa ibegey pinaagi te gehem te Wagas he Mulin-ulin is ketau te kedseysey te memezalem he ibepenurù te Megbevayà. <sup>9</sup>Ne ziyà te zuma pa ne ibegey is utew meheget he kedtuu ne is дума, ne ebegayan te gehem su wey zin mevewii is menge egkengezeruwan. Ne egkehimu zan is iring kayi su iyan gihapun ed-ulin kandan is Wagas he Mulin-ulin. <sup>10</sup>Ne ziyè pa te sevaha, ibegey zaan te Wagas he Mulin-ulin is gehem wey mekehimu sikandin te menge egkengein-inuwan; ne ziyà te zuma pa ibegey is ketau te kedseysaya te impesavut kandin te Megbevayà; ne te zuma pa ibegey kandin is kegketueni te ed-ulin, ke ebpuun be te Megbevayà is ed-ulin wey ke mezaat he mulin-ulin ve haazà. Ne zuen daan menge etew he ebegayan te Megbevayà te ketau te kegkagi te kinégiyan he kenè dan egketueanan. Ne zuen daan menge etew he ibegey kandan is ketau te kedluwas duen te egkegiyen kayi. <sup>11</sup>Ne is langun kayi he menge ketau, ne ziyà ebpuun te Wagas he Mulin-ulin, minsan pa kayi te wazà med-iring-iring he ketau he ibegey zin sumalà is gustu zin he ibegey ziyà te kada sevaha.

### Is Menge Parti te Lawa

<sup>12</sup>Ne minsan pa te kenà ed-iiring-iring is ketau he imbegey kenitew te kada sevaha, nesevaha kiw gihapun su iring kiw te sevaha zà he lawa ni Kristu he mezakel is menge parti zin. <sup>13</sup>Ne sikitew is langun, Hudiyu se kenà Hudiyu, suluguen se kenà suluguen, ne pudu kiw mibewtismuwan te sevaha zà he Wagas he Mulin-ulin; ne pinaagi kayi nehimu kiw en he sevaha zà he lawa, ne mid-ulinan kiw pudu te sevaha zà he Wagas he Mulin-ulin.

<sup>14</sup>Is lawa te etew ne sevaha zà he lawa, iyan, mezakel is menge parti zin. <sup>15</sup>Penenglitan ke ebpekekagi is paa, ne ke sikandin te, “Kenà a parti



te lawa su kenè e man belad.” Ne minsan pa ke iyan heini egkekagi zin ne kenà egkehimu he kenà parti te lawa is paa. <sup>16</sup>Ne ke egkagi zaan is telinga ne ke sikandin te, “Siak, kenà a parti kayi te lawa su kenè e man mata.” Ne minsan pa zaan ke iyan heini egkekagi zin, parti zed gihapun sikandin te lawa. <sup>17</sup>Su emun ke pudu mata is lawa te etew ne kenà sikandin ebpekezineg. Ne emun pudu telinga, ne kenà ebpekehazek. <sup>18</sup>Meupiya su kenà iring dutun is kedlimbaga te Megbevayà su te kedlimbaga zin te etew, midlimbag din dutun te lawa te etew is langun he kenà ed-iiring-iring he egkinehnglanen din sumalà is egkesuatan te Megbevayà. <sup>19</sup>Su wazà lawa he sevaha zà he parti. <sup>20</sup>Is lawa ta he midlimbag te Megbevayà, ne mezakel he parti, iyan, sebsevaha gihapun he lawa.

<sup>21</sup>Ne tenged kayi kenà egkehimu he egkagi is mata ziyà te velad te, “Sikew is belad, kenè ku sikew egkinehnglanen!” Ne iring din ded daan su is ulu, ne kenà egkehimu he egkagi ziyà te paa te, “Sikew is paa, kenè ku sikew egkinehnglanen.” <sup>22</sup>Su kenà egkehimu ke kenè ta egkegamit haazà is menge parti te lawa ta he kunaan ta ke wazè ta zuen egkegemitan. <sup>23</sup>Ne is menge parti he iring kayi, iyan ebpurangan ta. Ne haazà is menge parti te lawa ta he kenà meupiya ke ed-ahaan, ne edtembunan ta te bisti. <sup>24</sup>Ne haazà, kenè en pezem kinahnglan he edtembunan pa maan is parti te lawa he meupiya en he ed-ahaan. Umba iring kayi is kebeeli te Megbevayà te lawa ta su wey ta utew mepurangi is menge parti te lawa ta he henduen be te wazè din utew pulus. <sup>25</sup>Midhimu te Megbevayà is menge parti te lawa ta su wey zan mesevaha ne pinaagi zutun ebpekedtetevangè dan. <sup>26</sup>Ne ke egkezeruwan is sengeparti te lawa ta ne egkesekitan is tivuuk he lawa ta. Ne iring din ded daan ke ebpurangan is sengeparti ne igkezeyzey te tivuuk he lawa ta.

<sup>27</sup>Iyan kehulugan kayi te langun is: sikitew is menge tumutuu, ne menge parti kiw te lawa ni Kristu. <sup>28</sup>Ne is tivuuk he menge tumutuu, mibegayan te Megbevayà is kada sevaha te kenà ebpeked-iiring-iring he ebpevelan din. Iyan aney he vaal zin is: mibpili din is menge etew he midhimu zin he menge epustul. Ikezuwa, imbegey zin diyà te zuma is ketau te kedseysey te impesavut te Megbevayà. Iketelu, ne mibegayan din is duma he menge etew te ketau te kebpenurù te lalag din, ne mibegayan din is duma te gehem te kebpekehimu te egkein-inuwan. Ne is duma pa ne mibegayan din te gehem te kebewii te menge egkengezeruwan. Ne mibegayan din daan is duma te ketau te kedtevangi zan te menge zuma zan. Ne is duma pa, ne mibegayan din te ketau te ked-uwita zan te menge tumutuu. Ne is duma pa, mibegayan din te ketau te kegkagi te kinegiyan he kenè dan egkesavut. <sup>29</sup>Kenà egkehimu he is langun he menge tumutuu, ne pudu menge epustul wey kenà egkehimu he ebegayan is langun te ketau te kedseysey te impesavut te Megbevayà. Ne kenà daan

egkehimu he ebpenurù is langun, ne kenà daan egkehimu he ebegayan is langun te gehem te kebpekehimu te egkengein-inuwan. <sup>30</sup>Ne iring din ded daan kenà egkehimu he ebegayan is langun te gehem te kebpepawì te egkengezeruwan. Ne kenà daan ebegayan is langun te ketau te kekgagi te kinegiyan he kenè din egketuenan. Ne kenà daan egkehimu he ebegayan is langun te ketau te kedluwasa te egkegiyen kayi te metau he egkgagi te kinegiyan he kenè din egketuenan.

<sup>31</sup>Itagù niw ziyà te gehinawa niw he iyan hustu he ebuyuen niw ziyà te Megbevayà sikan is menge ketau he utew zekelà is pulus din. Iyan, duen pa paagi he utew pa zekelà is pulus din.

### Is Kebmahala te Zuma

**13** <sup>1</sup>Minsan ke ebegayan a te ketau te kekgagi te menge kinegiyan dini te kelibutan wey minsan is kinegiyan te menge velinsuguen diyà te langit, ne kenè ku ebmahalen is menge zuma ku, wazà pulus din su iring dà haazà is kekgagi ku te zaging te agung etawa kulingtangan. <sup>2</sup>Ne penenglitan ke ebegayan a te ketau te kedseysey te impesavut kedì te Megbevayà, ne egkesavut ku is minsan hengkey he kenà egkesavut te zuma wey is minsan hengkey he mezalem, ne minsan ke utew mezesen is kedtuu ku ne egkehimu he egkepengelinteuwan ku he mekehalin is buntud ne segugunà edhalin, iyan, ke kenà mahal zini te gehinawa ku is menge zuma ku, ne wazè ku gihapun pulus. <sup>3</sup>Minsan pa ke id-amin ku ibpemegey is menge azen ku ziyà te egkengeayuyau ne idtugut ku he edtutungen is lawa ku, iyan, ke kenà mahal zini te gehinawa ku is menge zuma ku, wazà daan pulus kayi te menge ulaula ku.

<sup>4</sup>Iyan, emun mahal ziyà te gehinawa ta is menge zuma he etew iyan heini egkeulaula ta: ebpekeantus ki te minsan hengkey he pesipala, dekelà is gagew ta, wazà kesina he netagù te gehinawa ta, kenà ki ebpegalbu wey ebpelawew, <sup>5</sup>kenà mahawag is menge ulaula ta, kenè ta idtegel is kenita he egkesuatan, ne kenè ki melemu egkepauk, kekenà, utew ki melemu he ebpekepesaylu te nekesalà kenita. <sup>6</sup>Emun mahal ziyà te gehinawa ta is menge zuma he etew kenà ibmeupiya te gehinawa ta is mezaat he ulaula su iyan igkelipey ta is menge metazeng he ulaula. <sup>7</sup>Ebpekeantus ki te minsan hengkey he meregen, ne kenè ta ed-isipen he mezaat is ulaula te zuma ta, kekenà, layun ki edsarig te keupiya te ulaula te zuma ta. Ne kenè ta ebelesan is ebpesipala kenita, kekenà, ebpesegdanan ta.

<sup>8</sup>Haazà is ketau te kedseysey te impesavut te Megbevayà, ne zuen timpu he egkeawà. Ne haazà is ketau te kekgagi te selakew he kinegiyan, ne egkeawà daan, ne iring din ded daan haazà is kegkesavut te menge mezalem he penurù su egkeawà daan. Iyan, is kebmahala te zuma he etew he ibegey te Megbevayà, ne kenà egkeawà su wazè din pidtemanan.

<sup>9</sup>Su is minge ketau wey is kedsavut te mezalem he penurù, ne kenè pa hustu heini. <sup>10</sup>Iyan, ke ibpesavut kenitew te Megbevayà is hustu ne zutun egkeawà haazà is kenè pa hustu.

<sup>11</sup>Dengan te vatè e pa utew, ne wazè pa mehustu is pengisip ku, is kegkagi ku, wey is kegegehinawa ku su ulaula pa haazà te kengunguhezi. Ne guntaan te megurang e en mid-engkezan ku en is minge zaan he ulaula te kengunguhezi. <sup>12</sup>Ne iring din ded daan, sikita, su guntaan iyan dà egketuenan ta is iring te alung he egepunen he egkeehè ta ziyà te pegelungan. Kenè te pa egkesavut is hustu. Iyan, keuzemà, kenà alung dà is egkeehè ta, kekenà, iyan en si Jesu Kristu is egkeehè ta. Ne zutun hustu mulà is kegkesevuta ta te langun iring te is Megbevayà, hustu is kegkesevuta zin kenita.

<sup>13</sup>Na, duen tetelu he ebpevelan kenita he kenà egkeawà. Kinahanglan he edtuuwan ta is Megbevayà, kinahanglan daan he layun ta ebperetenga is kegketuman te impenaad kenita te Megbevayà, ne kinahanglan daan he ebmahalen ta is minge zuma ta. Ne is lavew he meupiya kayi te tetelu, ne iyan is kebmahala ta te minge zuma ta.

#### Is Kegkagi te Minge Kinegiyan he Kenà Egkesavut

**14** <sup>1</sup>Umba, minge suled, kinahanglan he iyan niw ipehuna ziyà te gihinawa niw is kebmahala niw te minge zuma niw. Ne meupiya zaan ke ebuyuen niw is minge ketau he ibegey te Wagas he Mulin-ulin, lavew en is kedseysaya te impesavut te Megbevayà. <sup>2</sup>Ne emun duen ebpintezan te kinegiyan he kenè din egketuenan, iyan din egkelelagaan is Megbevayà ne kenè din iyan egkelelagaan is minge zuma zin he etew su kenè dan egkesavut is egkegiyen din. Haazà is egkegiyen din, ne in-ulin kandin te Wagas he Mulin-ulin, iyan, in-eles haazà su wazà ebpekesavut. <sup>3</sup>Iyan, ke zuen etew he edseysayen din is impesavut kandin te Megbevayà, minge zuma zin mulà is egkelelagaan din ne ebpeketavang heini su egkeheget is kedtuu zan, ne egkesembagan sikandan, wey egkelig-enan is kebpekeantus dan te meregen. <sup>4</sup>Ne haazà is etew he egkagi te kinegiyan he kenè din egketuenan, kandin dà he gihinawa is egketevangan din. Iyan, haazà is etew he edseysayen din is impesavut kandin te Megbevayà, egketevangan din mulà is minge zuma zin he tumutuu.

<sup>5</sup>Egkesuatan ku pezem he ikevegey keniyu te langun is ketau te kegkagi te kinegiyan he kenè niw egketuenan, iyan, utew pezem deyzey ke igkevegey keniyu is ketau te kedseysey te ibpesavut te Megbevayà. Su zekelà is pulus te kedseysey te ibpesavut te Megbevayà, kenà te kegkagi te kinegiyan he kenà egketuenan, asal, duen ded daan pulus kayi ke zuen ebpekeluwas su zutun ebpeketavang te langun he minge tumutuu haazà is egkegiyen. <sup>6</sup>Ne penenglitan, minge suled, ke ebpekeuma a

ziyan ne iyan dà egkegiyen ku keniyu is pinaagi zà te kinegiyan he kenè niw egketuenan, hengkey is pulus din? Deyzey ke idseysey ku keniyu is impesavut kedì te Megbevayà ne emun kenà haazà, ne kinahanglan he zuen ibpenurù ku keniyu he tuluuwen wey ke penurù be he impesavut kedì, ne human duen pulus te egkegiyen ku.

<sup>7</sup>Su penenglitan, is menge belvelayen he edaging, ke zuen ebpemulala wey ke ebpengutiyapi be, iyan, kenè din egketuenan is ked-epad, ne kenà egkesavut te menge zuma ke hengkey is in-epad din. <sup>8</sup>Ne iring din ded daan ke zuen sundaru he edhiyup te vudyung su ibpesavut din is menge zuma zin he ebpekidtebek dan en, iyan, ke kenà keladu is daging dutun, kenè dan egketuenan ke hengkey is ibpesavut din dutun te kedhiyup din ne kenè dan edsegipaan. <sup>9</sup>Ne sikiyu zaan, menge suled, iring kew kayi te ebpengutiyapi wey edhiyup te vudyung su emun egkagi kew te kinegiyan he wazà duen ebpekesavut, ne wazà pulus te egkegiyen niw. <sup>10</sup>Uteu medmezakel is menge kinegiyan dini te kelibutan, ne te kada sevaha kayi zuen ebpemekesavut. <sup>11</sup>Iyan, ke zuen ebpekidlalag kedì ne kenè ku egkesavut ke hengkey is egkegiyen din, ne kenà egkehimu he ebpezumehè key su kenè key edsinevutà. <sup>12</sup>Ne sikiyu, menge suled, geina te egkesuatan niw he mevegayi kew te menge ketau he ibegey te Wagas he Mulin-ulin, kinahanglan he iyan niw vuyua is menge ketau he ebpekeheget te kedtuu te langun niw te menge tumutuu.

<sup>13</sup>Ne tenged kayi, is etew he ebpekekagi te kinegiyan he kenè din egketuenan, kinahanglan he iampù din he mevegayi sikandin te ketau te kedluwas te egkegiyen din. <sup>14</sup>Su emun edlelagan ku is Megbevayà te kinegiyan he kenè ku egketuenan, ne egkehimu he ed-ampù a pinaagi te Wagas he Mulin-ulin, iyan, wazà mekeseled diyà te isip ku haazà is egkegiyen te vèbè ku. <sup>15</sup>Tenged kayi egkesuatan ku he mekeampù a he ed-ulinan te Wagas he Mulin-ulin, iyan, egkesuatan ku zaan he mesavut te menge zuma ku ke hengkey is egkegiyen ku. Ne emun egkanta a, egkesuatan ku he ed-ulinan a is egkanta te Wagas he Mulin-ulin, iyan, kinahanglan daan he egkesavut haazà is egkentahan ku. <sup>16</sup>Ne penenglitan ke edalig kew te Megbevayà he ed-ulinan kew te Wagas he Mulin-ulin, iyan, kenà egkesavut haazà is egkegiyen niw, is etew he sikan pa edsimba, kenà sikandin ebpekepegumbenar zutun te egkegiyen niw su kenè din egkesavut. <sup>17</sup>Minsan ke utew meupiya haazà is migkagi niw he kebpeselamati te Megbevayà, kenà ebpeketavang te kedtuu zutun te etew.

<sup>18</sup>Ebpeselematan ku te Megbevayà is ebpekekagi ku te kinegiyan he wazà duen egketau. Mezakel is kediey he kegemita kayi te ketau kenà is keniyu. <sup>19</sup>Iyan, minsan pa zutun, emun diyà a te ketiguman te menge tumutuu, kenè ku egemiten su meupiya pa zutun is kegkegiya ku te minsan lelima zà he lalag he egkesavut he ebpeketavang te menge zuma ku, kenà is kegkegiya te liblibuwen he menge lalag he kenà egkesavut.

<sup>20</sup>Kinahanglan, minge suled, he kenà iring te ked-isip te minge vatà is ked-isipa niw kayi. Iyan dà ulaula te vatà he meupiya he ed-iringan, haazà is kenè dan kegketueni te ked-isip te mezaat. Iyan, kinahanglan he iring te ked-isip te megurang is ked-isipa niw kayi. <sup>21</sup>Su zuen insurat he Lalag te Megbevayà he edhenduen te,

“Edsuguen ku ziyàn te keniyu te minge Hudiyu is minge etew he selakew is kinegiyan dan su kenè dan minge zuma niw he Hudiyu. Ibpekagi ku sikandan diyàn te keniyu, iyan, minsan pa zutun te utew igkeinuinu heini, kenè kew ebpepeming te ibpepenudtul ku kandan diyàn te keniyu.”

Iyan heini Lalag te Megbevayà. <sup>22</sup>Ne tenged kayi egkesavut ta he heini is ketau te kegkagi te kinegiyan he kenà egketueanan, ne ibegey heini te Megbevayà su wey metueni te kenà minge tumutuu he ebpuun heini ziyà te Megbevayà. Iyan, haazà is ketau te kedseysey te impesavut te Megbevayà, imbegey zin heini su wey meheget is kedtuu te minge etew he nemeketuu en.

<sup>23</sup>Umba, ke nengetigum is minge tumutuu wey egemiten te langun dutun is ketau te kegkagi te kinegiyan he kenè dan egketueanan wey ke penenglitan duen edseled dutun he minge bisita he sikan pa meketuu wey ke kenè be tumutuu ne kunaan dan ke ebunegen kew. <sup>24,25</sup>Iyan, ke iyan ed-ul-ulahan te langun is: edseysayen dan is ibpesavut kandan dutun te Lalag te Megbevayà, ne haazà is bisita, pinaagi zutun te nezineg din, egkesavut din ke hengkey is ked-isipa te Megbevayà dutun te mezaat he minge isip din, ne egketueanan din he mekesesalè bes sikandin ne ebpekendsendit. Ne zutun ed-ezapen din is Megbevayà ne ke sikandin diyà te keniyu te, “Tutuu ves iyan he ed-ulinan kew te gehem te Megbevayà!”

### **Is Dait he Ed-ul-ulahan Dutun te Kegkaamur-amur te Minge Tumutuu**

<sup>26</sup>Umba, minge suled, ke edtigum kew, iyan heini meupiya he ed-ul-ulahan. Meupiya ke zuen sevaha he andam te kegkanta te kedalig te Megbevayà, ne is sevaha, ebpenurù, ne is sevaha, idseysey zin is impesavut kandin te Megbevayà, ne zuen sevaha he egkagi te kinegiyan he kenè din egketueanan, ne zuen daan sevaha he edluwas kayi. Ne minsan hengkey he ed-ul-ulahan niw zutun ne kinahanglan he ebpekeheget te kedtuu te minge tumutuu. <sup>27</sup>Ke zuen ebpekekekagi te kinegiyan he kenè dan egketueanan, ne zezuwa zà is megkagi, ne emun kenà ne tetelu, ne kenè dan mebperedredsey ne kinahanglan he zuen dutun metau he edluwas. <sup>28</sup>Su emun wazà ebpekeluwas dutun ne kinahanglan he wazà megkagi te kinegiyan he kenà egketueanan. Egkehimu ke egkagi haazà is etew ziyà te Megbevayà asal kenà edhabet, kekenà, diyà dà te isip din. <sup>29</sup>Ne iring din ded daan haazà is minge etew he edseysey te impesavut kandan te Megbevayà su egkehimu he zezuwa

zà ne emun kenà ne tetelu is egkagi. Ne kinahanglan he ebpeming is langun ne ed-isipen dan ke hustu ve wey ke kenà haazà is egkegiyen. <sup>30</sup>Ne ke zuen ebpimpinuu zutun he ebpeming ne ibpesavut kandin te Megbevayà is ibpekagi zin kandin, ne kinahanglan he ed-engked egkagi haazà is nehuna su wey mekekagi haazà is дума zin. <sup>31</sup>Egkehimu he egkagi kew is langun, asal, kenè kew mebperedredseey ne zutun egkepenurù wey egkesembagan is langun. <sup>32</sup>Su is etew he ebpeneuven te Megbevayà, egkehimu zin te ed-egen is gehinawa zin su wey kenà sikandin mekeredsà dutun te egkagi he iring din he ebpeneuven daan te Megbevayà. <sup>33</sup>Kenà egkesuatan te Megbevayà he mebperedredseey kew emun edtigum kew is edsimba kandin. Su kenà iyan in-ulin kenitew is kegkelivegi, kekenà, iyan is melinawen he ulaula.

<sup>34</sup>Ne zuen pa idtelaan ku keniyu he iyan daan ed-ul-ulahan te munge tumutuu ziyà te minsan hendei he inged. Iyan is: kenè niw itugut he zuen bahi he ebpenurù ke edtigum kew te kedsimba. Mebpeninimè dan dà. Su impenurù daan te kesuguan te munge Hudiyu he kenà mebayàbayà is munge vahi. <sup>35</sup>Ke zuen id-insà te vahi ne kinahanglan he kenè din iinsà dutun te valey he edtiguman, kekenà, iinsè din te esawa zin emun nekeulì dan en. Su mekeeled-eled he ulaula is kegkagi te vahi zutun te kedtigum te munge tumutuu.

<sup>36</sup>Kunaan niw vuwa ke ziyàn dà ebpuun is Lalag te Megbevayà te keniyu! Ne emun kenà, ne kela ke kunaan niw ke iyan kew zà nepenurù te Lalag te Megbevayà. <sup>37</sup>Ke zuen etew he ed-isipen din he zuen ketau zin he imbegey te Wagas he Mulin-ulin, ne emun kenà, ne zuen ibpekagi kandin te Megbevayà, ne kinahanglan he ventayi zin is ibpesavut ku keniyu kayi te surat su kenà dini zà te kediey ebpuun heini he munge sugù, kekenà, diyà te Nengazen. <sup>38</sup>Ne tenged kayi emun kenà haazà is etew ebpeming kayi ne kenè niw zaan peminega is egkegiyen din.

<sup>39</sup>Na, munge suled, iyan niw ihuna ziyà te gehinawa niw is kedseysey te impesavut keniyu te Megbevayà. Kenè niw zewaya is etew he egkagi te kinegiyan he kenè din egketuenan, iyan, <sup>40</sup>kinahanglan he purungi niw tengkai is ed-ul-ulahan niw ke edtigum kew te kedsimba.

### Is Ketudluanan Mehitenged te Kegkevanhew ni Jesu Kristu

**15** <sup>1</sup>Ne guntaan, munge suled ku te kedtuu, ed-umanan ku sikiyu te ebpenurù mehitenged te Meupiya he Tudtulanen he impesavut ku zengan keniyu, ne midtuuwan niw ne midhemenan niw. <sup>2</sup>Ne pinaagi kayi te Meupiya he Tudtulanen he impenurù ku keniyu, egkelibri kew te silut te Megbevayà emun kenè niw ed-engkezan. Su emun ed-engkezan niw kenè bes hustu is kedtuu niw.

<sup>3</sup>Ne lavew kayi te langun he impesavut ku keniyu, haazà is impenurù daan kediey. Ne iyan is: si Kristu, mibpehimatey su wey kiw melibri

te silut mehitenged te minge salè tew sumalà is impesavut dengan te insurat he Lalag te Megbevayà. <sup>4</sup>Impesavut ku zaan he inleveng sikandin ne seled te tetelu he andew zutun nevanhew sikandin. Impesavut daan heini zengan te insurat he Lalag te Megbevayà. <sup>5</sup>Ne mibpaahà sikandin ki Pedro ne zutun mibpaahà daan te minge epustul zin. <sup>6</sup>Ne zutun mibpaahà daan sikandin te subra he lelima he gatus he nengetigum he minge sumusundan din. Ne kemulu pa uuyag guntaan is kezekelan kayi ne is duma nemematey en. <sup>7</sup>Ne netapus heini is kebpaaaha kandan, mibpaahà sikandin ki Santiago ne zutun mibpaahà med-uman te langun he minge epustul.

<sup>8</sup>Ne siak daan, iyan a ketepusan en he mibpaahaan din. Ne zutun te kebpeketuu ku iring a te vatà he netegel is ked-enaka kandin su minsan te kenà a pezem edtuu zutun, neketuu a gihapun. <sup>9</sup>Nelevawan a te langun he minge zuma ku he minge epustul su te wazè e pa meketuu midlupiglugupig ku te pesipala is minge tumutuu ki Jesus, ne tenged kayi kenà a pezem dait he egeraran he epustul. <sup>10</sup>Iyan, utew zekelà is hizu kediey te Megbevayà. Umba nehimu a he epustul su zuen pulus te kegehizuwi zin kediey. Tenged kayi, dekelà is nehimu ku kenà te nehimu te langun he minge zuma ku he epustul, asal, kenà a iyan is nekehimu kayi, kekenà, nehimu heini is langun pinaagi te tavang te Megbevayà. <sup>11</sup>Ne heini is tuluuwen he ibpesavut dey, wazà utew dipirinsya ke minsan hentei kenami te minge epustul is ebpenurù kayi ziyen te keniyu, su iyan ded tuluuwen he ibpesavut dey te langun ne iyan ded daan midtuuwan niw.

### Is Kegkevanhew te Minge Tumutuu

<sup>12</sup>Ne iyan impenurù dey keniyu is: nevanhew si Kristu. Ne tenged kayi, maan is egkegiyen te zuma keniyu he kenà egkengevanhew keuzemà is minge minatey? <sup>13</sup>Su emun kenà egkehimu he egkengevanhew is minge minatey wazà daan mevanhew si Kristu. <sup>14</sup>Ne emun wazà mevanhew si Kristu ne wazè en tuluuwen he igkepesavut dey ne wazè niw zaan egketuuwan. <sup>15</sup>Ne kenà duen dà taman su emun iyan haazà, ne egkehimu key he minge teruen he suluguen te Megbevayà su impenurù dey he is Megbevayà, mibanhew zin si Kristu, iyan, emun tutuu he kenè din ebenhawen is minge minatey, wazè din en benhawa si Kristu. <sup>16</sup>Su emun kenà egkehimu he egkengevanhew is minge minatey, ne wazè en daan mevanhew si Kristu. <sup>17</sup>Ne ke wazà mevanhew si Kristu neketuu kew te tarù, ne kenè en egkehimu he egkelibri kew te silut tenged te minge salè niw. <sup>18</sup>Ne haazà is minge zuma tew he tumutuu he nemematey en, wazè en daan paagi he melibri pa sikandan, kekenà, egkesilutan sikandan gihapun. <sup>19</sup>Sikitew is tumutuu he uuyag pa, ne zuen egkeperateng tew keuzemà diyà te langit he meupiya pinaagi ki Kristu, iyan, ke tarù heini

ne iyan kiw mekehizuhizu he minge etew zini te tivuuk he kelibutan su neketuu kiw te tarù.

<sup>20</sup>Iyan, tutuu is egkegiyen ku he nevanhew iyan si Kristu. Ne tenged kayi egketuenan tew he tutuu iyan he egkengevanhew zaan keuzemà is minge minatey su nehuna man mevanhew si Kristu. <sup>21</sup>Umba ebpmatey is langun he minge etew su tenged te mid-ulaula te nehuna he etew he si Adan. Ne iring din ded daan, iyan igkengevanhew keuzemà te minge etew he tumutuu su tenged te mid-ulaula te etew zed daan he iyan si Kristu. <sup>22</sup>Ebpmatey is tivuuk he menusiya su geina te nepengevilin tew te kepuun tew he si Adan is kemetayen. Ne iring din ded daan sikitew is langun he nesakup ki Kristu, egkengevanhew kiw keuzemà su iyan daan nesunud tew puun te egalen tew he si Kristu. <sup>23</sup>Iyan nehuna he nevanhew, si Kristu. Ne sikitew is minge sakup din, iyan kiw huziyan kandin he egkevanhew zutun te kebpekeli kù din keuzemà. <sup>24</sup>Ne zutun te egkeuma is ketepusan he andew he zutun id-awà ni Kristu is minsan hengkey he kuntada zin he edhadì wey ebayàbayà wey zuen din gehem. Ne zutun ibegey zin diyà te Amey zin he Megbevayà is kegehem din te kedhadì. <sup>25</sup>Ne te kenè pa haazà egkeulaula, kinahanglan he edhadì dè pa si Kristu taman te timpu he ed-eminen din edaaga is minge kuntada zin. <sup>26</sup>Haazà is ketepusan he kuntada he id-awà ni Kristu ne iyan is kemetayen te menusiya. <sup>27</sup>Su zuen insurat he Lalag te Megbevayà he edhenduen te, “Is Megbevayà, ebpehedian din ki Kristu is minsan hengkey.” Ne egketuenan ta he haazà is egkegiyen he “minsan hengkey,” ne wazà iragkes is Megbevayà dutun te minsan hengkey he edhedian ni Kristu. <sup>28</sup>Su emun egkesakup en keuzemà ni Kristu is langun, ne zutun ebpesakup daan si Kristu te Megbevayà he iyan kes mibegay kandin te kegehem te kedhadì te langun. Ne zutun iyan edhadì te minsan hengkey is Megbevayà.

<sup>29</sup>Ne heini pa zaan su emun kenà egkengevanhew is minge minatey, hengkey is pulus dutun te ulaula te minge etew he ebpebewtismu he elili te minge zuma zan he minatey en? Maan is ebpebewtismu zan ke kenà ebhawen te Megbevayà is minge minatey? <sup>30</sup>Ne sikami zaan, hengkey is pulus din dini te kenami ke kenè kiw egkengevanhew keuzemà? Su maan is ed-entusen dey pa is utew piligrù. <sup>31</sup>Su andew-andew, minge suled, egkeisip ku he kela ke edhimetayan a te minge kuntada te Megbevayà. Utew tutuu heini, minge suled; tutuu zaan he utew ku sikiyu igkelipey tenged te kedtuu niw te Nengazen tew he si Jesu Kristu.

<sup>32</sup>Utew mezakel is kemeresayan ku zini te Ipisu su iring is minge kuntada ku te minge ebpekekaid he langgam he egkesuatan e zan te edaas. Ne maan is ed-entusen ku pa is iring kayi ke kenà a keuzemà egkevanhew. Su emun iyan haazà ne meupiya pa ke edtumanen ku haazà is erubasa he edhenduen te, “Edlipey kiw en; ed-inum kiw ne egkaan kiw su kela ke megaan kiw en ebpatay ne egkehanew heini is langun.”



<sup>33</sup>Iyan, kenè niw itugut he meketuu kew te iring kayi su tarù. Tutuu iyan is erubasa he egkagi te, “Emun ebpekiduma ka te etew he mezaat is ulaula zin ne egkeiringan nu is ulaula zin wey ked-isip din.” <sup>34</sup>Likui niw is hustu he ked-isip ne engkezi niw is mezaat he ulaula. Netuenan ku he zuen дума niw ziyàn he kemulu pa wazà mesayud ke hengkey is tutuu he tuluuwen mehitenged te Megbevayà. Igkeeled niw pezem heini.

### Is Lawa he Ilengiten

<sup>35</sup>Ne ke penenglitan duen etew he ed-insà ke ebmenmenuwen te Megbevayà is kebenhawa zin te minge minatey wey ke hengkey is lawa zan dutun, <sup>36</sup>ne iyan tavak ku is: kenè bes metau he ed-isip-isip haazà is etew. Su emun ibpemula ta is benì diyà te tanà, ne kinahanglan he egkehalin is lawa zutun te venì. Su egkezeetan haazà is benì ne human edtuvù. <sup>37</sup>Ne haazà is ibpemula ta, ne venì dà duen. Egkehimu he parey is ibpemula ta, ne emun kenà, ne zuma pa he ibpemula. Iyan, haazà is benì he impemula, ne kenè en iyan sikan is lawa zin dutun te kedtuvù din. <sup>38</sup>Ne zaan he midhimu te Megbevayà ke hengkey is lawa he egkehimu te kada kelasi te venì he ibpemula. Is kada venì, ne zuen kandin he lawa he egkehimu ke edtuvù en.

<sup>39</sup>Ne iring din ded daan is lawa te minsan hengkey he linimbag he zuen din gehinawa su kenà ebpeked-iring. Emun etew ne sengekelasi is lawa zin, emun langgam ne sengekelasi zaan, ne iring din ded daan is tagbis wey pait su selakew zaan.

<sup>40</sup>Ne mezakel is linimbag te Megbevayà dini te tanà wey ziyà te langit. Ne pudu mekempet is minge linimbag din, iyan, kenà ebpeked-iring-iring is kekempet te kada sevaha. Selakew is kekempet te minge linimbag din diyà te langit ne selakew zaan is kekempet te langun dini te tanà. <sup>41</sup>Sengekelasi is kekempet te kedsilà te andew, selakew is kekempet te ked-anlag te vulan, ne selakew zaan is kekempet te minge vituen. Ne minsan is minge vituen, ne kenà ebpeked-iiring-iring is kekempet dan te kada sevaha.

<sup>42</sup>Ne keuzemà ke egkengevanhew is minge minatey, egkengehalin daan is minge lawa zan. Su umba idleveng is lawa te etew su egkezeetan, iyan, ke egkevanhew keuzemà kenè en maan egkezeetan te wazà pidtemanàn. <sup>43</sup>Ne haazà is lawa tew, dutun te kedlevenga kayi, ne kenà meupiya he ed-ahaan ne wazè din en pulus, iyan, ke egkevanhew ne utew mekempet ne utew mezesen. <sup>44</sup>Dutun te kedlevenga kayi te lawa ne kelibutanen dà heini, iyan, ke egkevanhew, ne vegu en maan he lawa he zait he ed-ubpà diyà te langit su midtulus en. Ke zuen lawa he kelibutanen, kinahanglan daan he zuen lawa he zait he ebpekeubpà diyà te langit. <sup>45</sup>Su zuen insurat he Lalag te Megbevayà he edhenduen te, “Haazà is nehuna he etew he si Adan, ne mibegayan te Megbevayà

is lawa zin te gehinawa su wey mekeubpà dini te tanà.” Iyan, si Kristu mulà, haazà is migeraran te huziyan he Adan, iyan sikandin ebegey te untung he wazà pidtemanan su wey kiw mekeubpà diyà te langit. <sup>46</sup>Kenà iyan edhuna is untung he wazà pidtemanan diyà te langit, kekenà, iyan edhuna is untung ta zini te kelibutan ne human egkehimu is untung diyà te langit. <sup>47</sup>Ne haazà is nehuna he etew he si Adan, linimbag sikandin ne is limbagan din ne iyan is tanà, iyan, haazà is etew he ed-ilis kandin he iyan si Kristu, ne ebpuun sikandin mulà diyà te langit. <sup>48</sup>Ne sikitew is menge kevuwazan ni Adan, ne tanà daan is limbagan tew su tanà is limbagan te kandin he lawa. Iyan, sikitew zaan is menge sakup te etew he ebpuun te langit, ne ebpekeiring is lawa tew keuzemà te kandin he lawa. <sup>49</sup>Su geina te nekeiring is lawa tew te lawa te nehuna he etew he tanà is limbagan din, kinahanglan he ebpekeiring is lawa tew zaan te lawa ni Kristu he iyan sikan is etew he ebpuun diyà te langit.

<sup>50</sup>Iyan ibpesavut ku, menge suled, is: heini is menge lawa tew he zuen kemetayen, ne kenà egkehimu he egkeragkes keuzemà te langun he edhedian te Megbevayà su haazà is lawa he zuen din kemetayen, kenà egkehimu he ebegayan te untung he wazà pidtemanan.

<sup>51</sup>Peminega niw heini is daan he in-eles he impesavut kediey te Megbevayà. Duen duma kenitew te menge tumutuu he kenà ebpatay, asal, sikitew is langun, segugunà egkehalin is lawa tew. <sup>52</sup>Su utew megaan heini; iring dà te sengeperà te mata is kegkeulaula kayi keuzemà ke ibpezaging te Megbevayà is budyung he tuus he iyan en ketepusan he andew tew zini te kelibutan. Su ibpezaging haazà is budyung ne egkengevanhew is menge minatey. Egkengehalin is menge lawa zan ne kenè dan en ebpatay. Ne sikitew is uuyag pa, egkengehalin daan is menge lawa tew. <sup>53</sup>Ne emun egkehita vù en heini, sikitew is duen din lawa he egkezeetan, ebegayan kiw te lawa he kenè en egkezeetan. Ne heini is lawa tew he zuen din kemetayen, ne egkeilisan te lawa he wazè din en kemetayen. <sup>54</sup>Ne zutun, sikitew is duen din kemetayen, ne kenè kiw en human ebpatay ne egketuman en haazà is insurat he Lalag te Megbevayà he edhenduen te, “Nepurung en maawà is gehem te kemetayen.”

<sup>55</sup>“Wazè en kegkehandek tew te kemetayen su wazè en ebpatay.

Wazè en kegkeseeng tew  
tenged te kemetayen  
su neilisan en te untung  
he wazà pidtemanan.”

<sup>56</sup>Umba egkehandek is menge etew te kemetayen su netueanan dan he emun ebpatay zan edsilutan sikandan tenged te mekesesalà sikandan. Ne maan is mekesesalà sikandan? Su geina te nekesupak dan te kesuguan te Megbevayà. <sup>57</sup>Ne minsan pa zutun egkehimu he edeligen tew is

Megbevayà su tenged te mid-ulaula zin, nezaag tew en is kemetayen pinaagi te Nengazen tew he si Jesu Kristu!

<sup>58</sup>Na, minge mahal ku he minge suled, geina te iyan heini, hegeta niw is kedsarig niw te Megbevayà su wey wazà ebpekezezaat te kedtuu niw. Peniguduwi niw tumana is ebpeveelan keniyu te Nengazen; hagù kew te taman te egkehimu niw su netuenan niw he emun iyan edtumanen niw is ebpeveelan te Nengazen, kenà egkehimu he wazà pulus te vaal niw.

### Is Tavang Diyà te Edlised

**16** <sup>1</sup>Ne zuen pa id-sugù ku keniyu mehitenged te ked-emutè niw te selapì he idtavang niw te egkengeayuayu he minge zuma tew he tumutuu. Insugù ku en daan heini te minge zuma tew ziyà te prubinsya he Gelasya. <sup>2</sup>Ne kada Duminggu ne kinahanglan he tegenaha te kada sevaha keniyu is ibegey zin diyà te Megbevayà. Sumalà is netigeyunan niw ne kinahanglan he itegeley niw is bahin te Megbevayà. Ne tipigi niw heini su wey emun ebpekeuma ad diyan ne wazè en kinahanglan he ed-emutè kew pa su zaan en he naandam. <sup>3</sup>Ne emun ebpekeuma a ziyan edsuguen ku ziyà te inged he Hiruselim sikan is ebpilien niw he minge etew wey zan meuwit is ibegey niw. Ne ibpeuwit ku zaan is minge surat su wey metueni te ebegayan ke hengkey is tuyù dan te ed-uwit. <sup>4</sup>Ne emun kinahanglan dutun he edhendiyà a zaan te Hiruselim, ebpekezuma zan kediey.

### Is Minge Telaan ni Pablo

<sup>5</sup>Edhendiyana a te Kurintu emun egketapus ku is tuyù ku ziyà te prubinsya he Mesidunya su egkeisip ku he ziyà a ebayà te Mesidunya. <sup>6</sup>Ne malù a egkeuget ke ziyana e en te keniyu. Kenà a vuwa ed-awà diyan taman te kenè pa egketapus is tipenguzan. Ne zutun te kedlaus ku, meupiya ke edtevangen a keniyu zutun te kedhipanew ku ke hendei a ebpevayà. <sup>7</sup>Kenè ku egkesuatan he megaan dà is kebpenumbaley ku ziyana, kekenà, iyan netagù te gehinawa ku is egketegtegaad a ziyana ke edtugut is Megbevayà.

<sup>8</sup>Egkeisip ku he kayi e pa ed-ubpà te inged he Ipisu taman te Pista te Pintikusti ne human a egenat. <sup>9</sup>Su mezakel pa zini is egkesuat he ebpemineg te Lalag te Megbevayà ne zekelà is pulus te ked-ubpè ku kayi, asal, mezakel zaan dini is minge kuntada te Megbevayà.

<sup>10</sup>Ne emun ebpekeuma ziyana si Timoteo ne purungi niw sikandin su suluguen daan sikandin te Nengazen he iring kediey. <sup>11</sup>Kinahanglan he edtehuzen niw sikandin, ne emun edlaus te hipenawan din ne tevangi niw sikandin, ne ipeehe niw is gagew niw kandin su wey mekelikù sikandin dini te kedì, su ebpeebuten ku sikandin wey is minge zuma zin he minge suled tew te kedtuu.

<sup>12</sup>Ne si Epulus he suled tew zaan tenged te kedtuu, kepipira ku en sikandin kegiyi he meupiya ke ebisitahan kew zin duma zuen te menge suled tew he mibisita ziyān. Iyan, egkagi sikandin te wazè pa meseled te gehinawa zin is kedhendiyān din. Iyan, edhendiyān sikandin ke wazè ebpekesamuk kandin.

<sup>13</sup>Layun kew, menge suled, med-andam; hemeni niw te edtuu si Jesu Kristu; kenè niw ikeeled is kedtuu niw, kekenà, ipeehè niw is kelig-en te kedtuu niw. <sup>14</sup>Ne minsan hengkey is ebeelan niw, layun niw ipaahà is kebmahala niw te menge zuma niw.

<sup>15</sup>Netuenan niw, menge suled, he iyan nehuna he nemeketuu ziyān te prubinsya he Gerisya ensi Istipenas. Ne wazè dan meduwazuwa te kedtevangi zan te menge zuma zan he tumutuu. <sup>16</sup>Ne tenged dutun, edhengyuen ku keniyu he peminega niw is sambag te menge etew he iring engki Istipenas wey is minsan hentei he menge zuma tew he ebpurung edtuman te ebpeveelan kandan te Nengazen tew.

<sup>17</sup>Uteu ad negalew hein nekeuma si Istipenas, si Fortunato wey si Ekeyiku su henduen be te netembaran is utew ku kebulunga keniyu. <sup>18</sup>Inmeupiya sikandan te gehinawa ku iring te inmeupiya zaan sikandan te gehinawa niw. Tehuza niw is menge iring kayi he etew.

### Menge Pengemusta

<sup>19</sup>Ebpengemusta keniyu is langun he menge tumutuu te langun he menge inged dini te prubinsya he Asya. Uteu zaan meheget is kebpengemustaha keniyu ni Ekilu wey si Priscila wey elin daan is menge tumutuu he edtigum diyà te valey zan dini te Ipisu. <sup>20</sup>Is langun he menge tumutuu he menge zuma ku kayi, ne ebpengemusta zan daan keniyu. Ne sikiyu zaan diyān, ne mebpelimlimuey kew.

<sup>21</sup>Te kedtepusa ku kayi te surat, egkegien ku he iyan e en si Pablo is midsurat kayi. Ebpengemusta a keniyu te langun.

<sup>22</sup>Ke zuen minsan hentei he wazè diyà te gehinawa zin si Jesus, ne verakat he siluti sikandin te Megbevayà. “Maran ata,” he ke vā dà egkegiya, megaan ka, Jesus, medlikù.

<sup>23</sup>Tuvazi kew is langun te Nengazen tew he si Jesus.

<sup>24</sup>Uteu kew mahal zini te gehinawa ku tenged te kedtuu tew ki Jesu Kristu. Iyan a si Pablo.